

LISTOVI

GRAČANIČKI GLASNIK
časopis za kulturnu historiju

Broj 49
Godina XXV
Maj, 2020.
[str. 169-200]

© Monos 2020

Listovi gračaničkog kalendara od 11. 11. 2019. do 2. 6. 2020.

Prof. dr. Omer Hamzić

21. 11. 2019.

Prvi cjeloviti koncert gračaničkog instrumentalnog jazz sastava "B strana"...

...održan je u sali za koncerte Muzičke škole u Gračanici. Nastupili su: Miralem Mejremić – klavir, Haris Tahirović – harmonika, Nina Majdančić – truba, Aldin Sumbić – bas gitara i Esmir Skrebo – bubanj. Stilovi koje bend svira su: jazz, blues, latino, fusion i etno. Koncert je održan pod pokroviteljstvom Gradske uprave i uz podršku nekoliko sponzora. Pojava ovog benda izazvala je zapaženo interesovanje publike, pa se očekuje da će ovih nekoliko talentovanih i ambicioznih muzičara značajno obogatiti muzičku scenu u Gračanici i ne samo u Gračanici.

23. 11. 2019

Nagrada za slikarstvo Udruženja likovnih umjetnika Tuzlanskog kantona pripala je akademskom slikaru Semiru Osmanhodžiću iz Gračanice

Uručena mu je prilikom otvaranja Selektivne izložbe članova Udruženja likovnih umjetnika TK na kojoj se predstavilo četrdesetak autora. To će, svakako, biti poticaj i priznanje mladom slikaru, koji je nedavno primljen u članstvo Udruženja likovnih umjetnika TK. Inače, pod njegovim vođstvom je u toku treći mjesec četveromjesečnog kursa slikanja koji u Bosanskom kulturnom centru u Gračanici pohađa 30-ak polaznika. Finale kursa bit će praćeno posebnom izložbom na kojoj će biti predstavljeni najbolji radovi polaznika kursa.

25. 11. 2019.

Program obilježavanja Dana državnosti Bosne i Hercegovine u Gračanici...

...započeo još u petak, 22. 11., kada je u Velikoj sali Bosanskog kulturnog centra održana priredba učenika Druge osnovne škole i Osnovne škole "Hasan Kikić". Sljedećeg dana, izvedena

LISTOVI...

je tradicionalna šetnja "Moja domovina, moj ponos" u organizaciji Sportskog saveza Gračanica. Prije polaska učesnici "Šetnje..." položili su cvijeće na Centralnom spomen-obilježju, odakle su se uputili u pravcu Visa. Na Svečanoj akademiji koja je održana na sam Dan državnosti u sali Muzičke škole, prigodan referat posvećen tom datumu pročitao je Predsjedavajući gradskog vijeća, Nihad Krajinović, prigodan kulturno-umjetnički program izveli su učenici Gimnazije "Dr. Mustafa Kamarić" te profesorica muzike Dženana Subašić. Program obilježavanja ovog značajnog datuma završen je likovnom izložbom Gordane Mehmedović, po naslovom "Četiri godišnja doba" u foajeu Bosanskog kulturnog centra.

27. 11. 2019.

Umro dr. sc. Amir Baraković iz Gračanice, profesor na Rudarsko-građevinskom fakultetu Univerziteta u Tuzli

Rođen je 1955. godine u Miričini, gdje je završio Osnovnu školu. Po završetku saobraćajno-tehničke škole u Tuzli, upisao je i završio Rudarsko-geološki fakultet u Tuzli (1978.), na kojem je, 1991. godine odbranio i magistarski rad o nalazištima i rezervama gline u rejonu Ciglane "Sočkovac" u kojoj je, inače, radio na stručno-tehničkim poslovima. Nakon prvih parlamentarnih izbora i jedno vrijeme poslije rata bio je aktivan u lokalnoj politici, između ostalog obavljao je i dužnost zamjenika općinskog načelnika za privredu kao kadar SDP. Doktorirao je na matičnom fakultetu u Tuzli 1996. godine, stekavši zvanje doktora tehničkih nauka iz oblasti geologije. Na istom fakultetu, nešto kasnije izabran je za prvo za docenta, potom za vanrednog i redovnog profesora za predmete iz oblasti geodezije i rudarstva. Objavio je nekoliko udžbenika i više stručnih radova, učestvovao na brojnim domaćim i međunarodnim naučnim skupovima. Nakon kraće

bolesti, umro je u 64. godini života Ukopan je 29. 11. u mjesnom greblju u Miričini.

28. 11. 2019.

Asfaltiranje, asfaltiranje: Gornja Orahovica, Gornja Lohinja i Piskavica

Po svemu sudeći, zahvaljujući lijepom vremenu i ažurnosti gradske administracije, ovogodišnji plan rekonstrukcije i asfaltiranja lokalnih puteva na području grada Gračanica bit će u potpunosti realizovan. Tako je proje dva dana u mahalama Bare i Dobrnjiči u Gornjoj Orahovici asfaltirano 230 metara lokalnih puteva, širine 3 metra u vrijednosti od 25.000 KM. Urađeni su i potporni zidovi pored Spomen obilježja šehidima, uređeno mezarje Cerik do kojeg je asfaltiran pristupni put i plato sa potpornim zidovima. Uloženo je oko 15.000 KM. Nadalje, u mjesnoj zajednici Gornja Lohinja završeno je asfaltiranje dijela puta u dužini od 150 i širine 3 metra. Učešće su uzeli i građani, a ukupna vrijednost izvedenih radova je oko 18.000 KM. Ovih dana asfaltiran je i put prema mjesnom mezarju u Piskavici u dužini od 140 metara, širine 5 metara. Ukupna vrijednost je oko 19.000 KM. Svoje učešće su dali i građani.

2. 12. 2019.

Održana 7. sjednica Gradskog vijeća Gračanica: rebalans gradskog Budžeta i prijedlozi za Budžet TK u 2020. godini

Prije prelaska na dnevni red, Vijeće je podržalo inicijative Gradonačelnika koje će biti upućene Vladi TK: pod jedan: da se Budžetom Tuzlanskog kantona za 2020. godinu, umjesto 300.000 KM za opremanje Sportske sale u Gračanici planira iznos od 500.000 KM kako je i dogovarano sa predstavnicima Vlade TK, pod dva, da se planiraju sredstva za sanaciju regionalnog puta Gornja Orahovica-Srebrenik, pod tri, da se planiraju sredstva za izgradnju kružnog toka kod Bosanskog kulturnog centra u Gračanici, na regionalnom putu za Srebrenik i Srnice i pod

četiri, da se planiraju sredstva za utopljanje osnovne škole Soko i izradu projekta raskrsnice kod skretanje za Škahovicu na spomenutom regionalnom putu. Iz dnevnog reda ove sjednice izdajamo Odluku o izmjenama i dopunama Budžeta Grada gračanica za 2019.godinu. U obrazloženju Gradonačelnika navodi se da je "Budžet uravnotežen, te su u skladu sa prihodima planirani i rashodi. Došlo je do preraspodjele unutar pojedinih stavki i namjena na bazi procjene ostvarenja do kraja godine i nekih novih potreba, kao što je podrška Rukometnom klubu za Evropsko takmičenje." Rebalansom koji je jednoglasno usvojen ukupni prihodi planirani su u iznosu od 14.743.766 KM što je u odnosu na važeći budžet manje za 22.085 KM. Porezni prihodi su veći za 411.616 KM, neporezni prihodi su manji za 263.241 KM i grantovi/potpore su manji za 170.460 KM. Na isti način usvojena je i Odluka o komunalnim djelatnostima kao i Prijedlog Ugovora o regulisanju međusobnih prava i obaveza u vezi s povjeravanjem na upravljanje i korištenje javnih dobara – Zelena pijaca s JP "Komus" doo Gračanica, te data saglasnost za njegovo potpisivanje. Razmatran je i usvojen Izvještaj o radu Zdravstvenog savjeta, te primljene k znanju tri informacije: o stanju i potpunosti izbjegličkih naselja na području općine Gračanica, o realizaciji projekta harmonizacije katastarskih i zemljišnoknjižnih podataka za 8. fazu projekta registracije nekretnina, te Informacija o sportu na prostoru grada Gračanica.

3. 12. 2019.

Skromno obilježena 26. godišnjica formiranja 212./222. Bosanske oslobodilačke brigade

Nakon polaganja cvijeća na Centralno spomen obilježje, prisutnima se obratio ratni komandant brigade Bahrija Džananović, a potom i Gradonačelnik Nusret Helić. Ovu slavnu brigadu, kako je rekao komandant Džananović, popunjavali su najhrabriji borci

iz Gračanice, naselja sadašnje općine Doboj Istok i Lukavca. U trenutku formiranja, brigada je imala 1200 vojnika. Tokom rata u redovima brigade borilo se oko 2500 vojnih obveznika. Gubici brigade tokom rata: 87 poginulih i preko 700 teže i lakše ranjenih.

10. 12. 2019.

Asfaltiranje, asfaltiranje: Lukavica (Zolje, Prnjavor, Sokak)

U mahali Zolje asfaltirane su dvije kraće asfaltirane dionice ukupne dužine od 460 metara. Asfaltiranje je završeno i u Prnjavoru gdje je urađen krak puta iznad džamije, dužine od 215 metara. Sredstva u iznosu od cca 70.000 konvertibilnih maraka izdvojena su iz Gradskog budžeta za 2019. godinu, a učešće u pomenutim projektima su uzeli i građani u iznosu od 10%. Uskoro bi trebalo da bude sanirana i dionica oštećenog puta Sokak, koji je predstavljao ogroman problem za mještane.

11. 12. 2019.

Promocija "Gračaničkog glasnika" br. 48: u znaku obilježavanja 60. godišnjice osnivanja Narodnog univerziteta i 50. godišnjice Radio Gračanice

Najviše tekstova posvećeno je historijskom razvoju te dvije značajne ustanove koje su ostavile vidne tragove u društvenom i kulturnom životu Gračanice u posljednjih pola vijeka. O rezultatima i razvoju narodnog univerziteta na promociji je govorio Glavni i odgovorni urednik "Gračaničkog glasnika" Omer Hamzić, podsjetivši da je i emotivno vezan za Narodni univerzitet, odnosno Radio Gračanicu jer je u njima dobio prvo zaposlenje i stekao svoje prvo radno iskustvo, da bi nekoliko godina kasnije postao i direktor Narodnog univerziteta. O jubileju Radio Gračanice, a posebno na okolnosti pod kojima je osnovana ukazao je Edin Šaković, član Redakcije ovog časopisa i autor opširnog članka o Radio Gračanici. Ulogu moderatora na promociji ovog broja "Glasnika" imala je



glavna i odgovorna urednica Radio Gračanice Melina Kurtović, koja je obećala da će i sadašnji kolektiv radija kojeg čine obrazovani i ambiciozni ljudi i dalje postojati tu zbog svojih slušatelja i nastojati da radio u eri digitalnih medija ostane prijatelj mnogih domova. Direktor Bosanskog kulturnog centra Gračanica Nedžad Peljto, osvrnuo se na trenutno stanje i blisku budućnost te ustanove, koja je, zapravo, nastavak nekadašnjeg Narodnog univerziteta. Posjetitelji su imali priliku vidjeti retrospektivnu izložbu posvećenu jubileju Radio Gračanice, čiji je autor Edin Šaković, te izloženu opremu sa kojom su uposlenici Radija radili u svojim početcima. Za posebnu atmosferu večeri bio je zadužen gračanički sevdalija Esed Eso Kovačević i etnomuzikolog Damir Galijašević. Promociji je prisustvovao veliki broj Gračanlija i gostiju iz nekoliko susjednih gradova, koje je u svoje ime pozdravio i Gradonačelnik Nusret Helić, čestitajući Redakciji za novi broj "Glasnika", a uposlenicima spomenutih ustanova ove značajne jubileje.

12. 12. 2019.

"Gledano statistički", smanjuje se broj nezaposlenih lica u Gračanici

Prema evidenciji Biroa za zapošljavanje, u mjesecu oktobru bilo je 7045, a u novembru 6997 nezaposlenih, što predstavlja smanjenje za 48. Prema stručnoj spremi, među nezaposlenima je 2778 kvalifikovanih radnika i 412 sa fakultetskom diplomom. Broj kori-

snika novčane naknade je 211, a broj korisnika zdravstvene zaštite 4103.

16. 12. 2012.

Asfaltiranje, asfaltiranje: Bahići, Miričina...

Riječ je o dionici puta dužine cca 240 metara koji ide iz pravca Babića prema naselju Bahići (iznad gračaničkog naselja Javor). Vrijednost radova je 30.000 KM. Svoje učešće su dali i mještani. I u MZ Miričina, u naselju Kurtovići završeno je asfaltiranje dionice puta od cca 270 metara i 4 metra širine. Vrijednost radova je oko 40.000 KM. I u ovom slučaju, svoje učešće dali su i mještani....

16. 12. 2019.

Otvaranjem klizališta na rukometnom igralištu počela "Zima u Gračanici"

Otvaranje sezone obilježeno je nastupom "Haos animatora" na ledu. Tokom manifestacije, omladini i građanima Gračanice bit će ponuđeno niz različitih sportskih i kulturnih sadržaja, kao što je "Disko na ledu", koncert Muzičke škole, nekoliko izložbi i pozorišnih predstava, razni novogodišnje programe za djecu, te konačno, doček Nove godine na otvorenom u centru grada.

18. 12. 2019.

"Narodni poslanik" Mirele Trepanić – u izvedbi Dramske sekcije KUD-a "Adem Alić" Gračanica

Za ovu predstavu, koja je premijerno izvedena u velikoj Sali Bosanskog kulturnog centra, vladalo je nezapamćeno interesovanje u gradu. Ulaznice za premijeru i prvu reprizu narednog dana bile su razgrabljene nekoliko dana prije premijere. Druga repriza najavljena je za 21. decembar. Predstava je rađena po tekstu velikog srpskog komediografa Branislava Nušića. "Narodni poslanik", koji je redateljka prilagodila aktuelnom vremenu i lokalnoj sredini, varirajući temu osvajanja vlasti u provinciji. U predstavi glume: Miralem Džaferović, Mersiha Jogunčić, Adna

Džaferović, Maid Džaferović, Alisa Marma-
rac, Fahrudin Krčić, Adisa Mustajbašić,
Mirza Krčić, Selmir Gopo, Esad Grbešić i
Jusuf Ljević.

22. 12. 2019.

Otvorena izložba slika akademskog slikara Semira Osmanhodžića i 29 polaznika likovnog kursa za ljubitelje likovne umjetnosti i odabrane talente

“Ovo je četvrti ciklus slikanja koji se održava
ovdje u Bosanskom kulturnom centru” kroz
koji je prošlo preko 100 polaznika, djece i
odraslih,” podsjetio je Osmanhodžić. “Ovo-
liki broj posjetitelja se rijetko gdje nađe na
izložbama, što je znak da je i ova izložba za-
ista uspješna”, rekao je Gradonačelnik Helić
na otvaranju izložbe u Bosanskom kultur-
nom centru i uputio riječi pohvale ovom
vrijednom mladom umjetniku za sav njegov
dosadašnji trud i entuzijazam – i kao likov-
nog umjetnika i kao likovnog pedagoga.

23. 12. 2019.

Asfaltiranje, asfaltiranje: Pribava, Donja Orahovica, Stjepan Polje

Asfaltirano je oko 160 metara dionice puta
u Pribavi, naselje Bunarić. Uloženo je oko
19.000 KM iz Budžeta Grada, uz značajno
učesće građana. U Donjoj Orahovici, u na-
selju Karići asfaltirana je dionica mahalskog
puta, dužine oko 140 i širine 3 metra. Vrijed-
nost radova 17.000 KM. U Stjepan Polju, u
naselju Polje, do mosta, asfaltirana je dionica
dužine 100, a širine 4 metra. Uloženo je oko
15.000 KM. Završeno je i asfaltiranje ulice
Podlepar u Gračanici. Uloženo je oko 24.000
KM. Pored budžetskih sredstava projekat su
jednim dijelom finansirali i građani.

25. 12. 2019.

Dodijeljena priznanja za najuspješnije sportiste u 2019. godini...

...koju godinama organizuje Sportski savez
Gračanica, pod pokroviteljstvom Gradske
uprave. Za najbolje sportiste u 2019. progla-

šeni su: karatistkinja Mubina Rešidbegović iz
Karate kluba “Gračanica” i košarkaš Košar-
kaškog kluba Nadir Mešetović. U kategoriji
invalidnog sporta za najuspješnijeg je progla-
šen zlatni paraolimpijac Hasan Sejdinović.
Najuspješniji ženski sportski kolektiv je Ženski
odbojkaški klub Gračanica, a u *muškoj kon-
kurenciji* nagrada je otišla u Rukometni klub
“Gračanica”. *Najbolji trener* u 2019. godini
je Aldijana Mehić-Džaferović iz Judo kluba
“Pribava” dok je za *najuspješnijeg sportskog
radnika* proglašen aktuelni predsjednik RK
“Gračanica” Nedim Musić. *Najbolji junior*
je Amer Džindić (“Kaskada”), a *najbolja
juniorica* Adela Husamović (JK “Pribava”).
Najbolji kadeti su Ajla Hidić (“G-Stars”) i
Osman Selimović (BK “Gračanica”). U *pionir-
skoj konkurenciji* nagrade su dobili Amina
Husejnović (KK “Gračanica”) i Salim Šabić
(RK Gračanica). *Posthumna priznanja* do-
dijeljena su Fahrudinu Valjevcu, Ahmetu
Zejniliću, Mustafi Okiću i Seadu Dura-
koviću-Plovku. *Posebna priznanja za razvoj
sporta* na području Gračanice dobili su: Mi-
dhat Mujačić (rukomet), Muhidin Halilović
(odbojka), Mirza Sumbić (nogomet), Nesib
Okić (nogomet), Esed Mujačić (nogomet),
juniorska plesna formacija Plesnog kluba
“Rock Step”. Za *najuspješniju osnovnu školu u
sportu* proglašena je OŠ Džakule a *najuspješ-
niji nastavnik* u toj školi je Sanel Zaketović.
Najuspješnija srednja škola je Mješovita sred-
nja i profesor Mirsad Selimović.

25. 12. 2019.

Primopredaja šest stambenih jedinica iz projekta “Oporavak od poplava”

U okviru UNDP-programa trajnog zbrinja-
vanja žrtava poplava iz 2014. godine, sagra-
đene su kuće po principu “ključ u ruke” za
šest novih porodica čiju su imovinu uništila
klizišta. Pet stambenih jedinica je izgrađeno
u Gračanici i jedna u Lukavici. Grad je obez-
bijedio zemljište, finansirao izgradnju te-
melja kuća, te svih potrebnih dozvola i ko-
munalne infrastrukture. Ranije je izvršena

primopredaja još 10 izgrađenih i 6 saniranih objekata. Inače, u okviru ovog projekta, do sada je sagrađeno i obnovljeno preko 50 stambenih objekata, što je dva puta više u odnosu na početne planove sanacije.

26. 12. 2019.

Svečano otvoren novogodišnji “Zimski bazar” u centru Gračanice...

...koji već četvrtu godinu zaredom organizuje Gradska uprava Gračanica, u saradnji sa Bosanskim kulturnim centrom, nevladinim organizacijama, osnovnim i srednjim školama. Manifestaciju su obogatili nastupi učenika Mješovite srednje škole, gimnazije “Dr. Mustafa Kamarić” kao i najmlađi iz obdaništa “Naša djeca”. Bazar je izložbeno-prodajnog karaktera te posjetioci imaju priliku da pogledaju i kupe radove udruženja: “Bosna art” Stjepan Polje, udruženja žena Donja Orahovića, Pribava, “Gradina” Soko, “Plodovi zemlje” Lukavica, “Behar” i “Izvor” Škahovica, “Mirićanke” Mirićina, KUD-a “Adem Alić” Gračanica, “Gračaničko keranje”, Udruženje pčelara “Bagremovac”, Dom zdravlja – Centar za mentalno zdravlje, Resursni centar za dijete i omladinu, Udruženje “Futura”, nastupili su i učenici Gimnazije “Dr. Mustafa Kamarić”, MSŠ Gračanica, O.Š. “Hasan Kić” i Druge osnovne škole. U popodnevnom satima objavljeno je i takmičenje u pripremi četenije.

26. 12. 2019.

Održana osma sjednica Gradskog vijeća Gračanica: usvojen Budžet za 2020. godinu...

... u iznosu od 18. 407.252 KM, što je za oko 5 miliona KM više u odnosu na predloženi Nacrt Budžeta. Gradonačelnik je kao predlagač u svom obrazloženju obavijestio vijećnike da je prihvaćeno puno kvalitetnih prijedloga sa javne rasprave o Budžetu. Raduje podatak da se u kapitalne projekte izdvaja više od 8 miliona KM ili blizu 44% Budžeta. Tako se za završetak sportske dvorane na Bazenu planira

2,6 miliona KM, za puteve i ulice više od 2,2 miliona, za vodosnabdijevanje preko 1,1 miliona, za otpadne i oborinske vode i regulaciju vodotoka preko 850 000 KM itd. U kontekstu planova za 2020. jednoglasno je data Saglasnost Gradonačelniku da može provesti aktivnosti i procedure za kreditno zaduženje Grada u iznosu od 2 miliona KM, namjen-ski za dovršenje sportske dvorane “Bazen”. Očekivanja su da će taj posao biti završen do početka naredne školske godine, čime će se stvoriti puno bolji uslovi za izvođenje nastave tjelesnog odgoja učenika srednjih škola, ali i za niz drugih sportskih i kulturnih sadržaja u gradu. Pored Budžeta, na ovoj sjednici usvojen je Programa rada Gradskog vijeća za 2020. godinu i Informacija o stanju zaštite građana od neeksplozivnih i minsko-eksplozivnih sredstava na području Grada Gračanica u 2019. godini.

27. 12. 2019.

Asfaltiranje, asfaltiranje...i još ponešto u Gornjoj Orahovici

Kako je objavljeno na službenom portalu Grada, u mahalama Bare i Dobrnjići završeno je asfaltiranje dijela lokalnog puta u dužini od ukupno 230 metara, širine 3 metra. Vrijednost radova iznosi 25.000 KM. Završeni su i radovi na podizanju, tzv. “soklenog” zida pored Spomen obilježja šehidima, a uređeno je i mjesno mezarje u mahali Cerik. Podignut je potporni zid, te asfaltiran pristupni put i plato. Vrijednost radova na ta dva objekta iznosi oko 15.000 KM.

10. 1. 2020.

Asfaltiranje, asfaltiranje: Malešići i Stjepan Polje ubrzano se povezuju potpuno asfaltiranim putem

Radi se o trećoj fazi rekonstrukcije i asfaltiranja tog starog, u neka vremena gotovo neprohodnog puta između ta dva sela. U ovu dionicu uloženo je 35.000 KM. Uskoro se očekuje asfaltiranje i posljednje dionice na tom putu, što je od velike važnosti za oba sela,



a posebno za Malešiće koji tom saobraćajnicom dobijaju drugi “asfaltni izlaz u svijet” Nosilac projekta je Grad Gračanica, a izvođač radova domaća firma “Roding”.

20. 1. 2020.

U 61. godini života umro pukovnik Bahrija Džananović, ratni komandant 212/222. oslobodilačke brigade Armije Bosne i Hercegovine

Ostat će upamćen kao komandant jedne od najelitnijih i najborbenijih brigada u Armiji BiH, na čijem je čelu bio od njenog osnivanja, 3. 12. 1993., do samog kraja rata. Ratni put 212. pratile su velike pobjede, ali i osjetni gubici... Od oslobađanja Stambenih, Trepala, Vijenca, Visa, ali i žrtve za kojima je ostajao vječni žal. Kao komandant, uvijek je o njima govorio s ponosom, ali i s osjećajem iznimnog duga. Komemoracija komandantu upriličena je 21. 1. 2020. u 11 sati u velikoj Sali BKC u Gračanici. U ime svih boraca, riječima dubokog poštovanja od svog komandanta oprostio Samir Nukić, njegov bliski suradnik, načelnik štaba 212. bosanske oslobodilačke brigade (Govor Samira Nukića objavljujemo u rubrici “Zavičaj”, u ovom broju našeg časopisa). Na zasluge, lik i djelo komandanta Bahrije u svojim obraćanjima podsjetili su i načelnici općina Gračanica i Lukavac – Nusret Helić i Edin Delić. Istoga dana obavljena je i dženaza, koja je krenula poslije ikindije namaza ispred Šarene džamije u Gračanici prema mjesnom greblju Šabuša u

kojem je komandant i ukopan. U organizaciju dženaze uključile su se boračke organizacije Gračanice, Lukavca i Doboj-Istoka, te OS BiH (O komandantu Džananoviću vidi opširnije u rubrici “Likovi zavičaja” u ovom broju našeg časopisa).

22. 1. 2020.

Malo pozitivne demografske statistike za Grad Gračanicu: u 2019. rođeno 560 beba, a umrle 482 osobe

Novorođenih je, dakle, za 78 više od broja umrlih osoba. Prirodni priraštaj je za 5 rođenih beba veći u odnosu na prethodnu godinu. U posljednjih 6 godina najveći prirodni priraštaj zabilježen je u 2016. godini, kada je bilo za 150 više rođenih u odnosu na broj umrlih. Prema podacima nadležnih službi Grada Gračanica, gledano po naseljima, najviše rođenih u 2919. bilo je u samoj Gračanici, kao najmnogoljudnijem naselju na gradskom području (167 novorođenih), na drugom mjestu su Malešići, Stjepan Polje i Donja Orahovica sa po 37 novorođenih, na trećem Pribava sa 36, potom Lukavica i Babići sa po 30, slijedi Gornja Orahovica sa 26, Miričina sa 23, Doborovci i Škahovica sa po 22, Soko i Džakule sa 18, Vranovići sa 14, Gornji Doborovci sa 9, Donja Lohinja i Piškavica sa po 7, Rašljeva sa 6, Prijeko Brdo 5, Buk 4, Trnovci 3, Lendići i Gornja Lohinja sa po jednim novorođenčetom, u 2019. Od 560 gračaničkih novorođenčadi, 285 je rođeno u porodilištu Opće bolnice Gračanica. Ovo su svakako lijepe informacije u moru onih koje govore o bijeloj kugi i demografskom praznjenju ovih prostora. Poređenja radi da podsjetimo: u prvih šest mjeseci 2019. godine u Federaciji BiH prirodni priraštaj je bio minus 2757! Od deset, čak u devet kantona u Federaciji u tom periodu bilo je više umrlih nego rođenih. Samo je Srednjobosanski kanton u tome bio pozitivan izuzetak. Objavljeni demografski podaci za prostor Republike Srpske još su nepovoljniji. (podatke objavio Radio Gračanica)

29. 1. 2020.**Izvršena primopredaja izgrađene kanalizacije na području Mjesne zajednice Gračanica**

Radi se o projektu izgradnje i rekonstrukcije prioriternih dionica fekalnih i oborinskih kolektora i zaštita novoizgrađene kolektorske mreže kroz izgradnju regulacije kao jednom od značajnijih infrastrukturnih projekata na području grada. Krajem prošle godine završena je rekonstrukcija fekalne i oborinske kanalizacije kao i izgradnja nove kanalizacije kroz naselja Čiriš, Varoš i Lendići u ukupnoj dužini od oko 5.741 m fekalne i oko 358 m oborinske kanalizacije, čime je smanjeno zagađenje rijeke Sokoluše i poboljšana zaštita okoliša. Ukupna vrijednost izvršenih radova iznosi: 683.802,42 KM, od čega je Fond za zaštitu okoliša F BiH sufinansirao projekat grant sredstvima u iznosu od 200.000,00 KM, dok se preostali dio finansiran iz kreditnih sredstava Evropske investicijske banke.

30. 1. 2020.**Održana 9. sjednica Općinskog vijeća: Odluka o komunalnom redu i Odluka o pristupanju izradi zoning plana područje Sijedog krša...**

...bile su dvije tačke koje su izazvale najviše pažnje i diskusije. Prvom se regulišu važna pitanja iz oblasti komunalija, a dugom nagovještava po prvi put planska zaštita nekog od raspoloživih prirodnih resursa gradskog (daskora u administrativnom smislu opštinskog) područja. Plan je, zapravo, uvod u pozicioniranje Sijedog krša i Visa kao turističko-rekreativne destinacije. Da li će se ovim aktom otvoriti put za zoniranje i zaštitu i ostalih sličnih lokacija, poput Četovulje i Monja, ostaje da se vidi. Sve je u rukama lokalne vlasti. Od važnijih tačaka, spomenimo još Program rada gradonačelnika za 2020. koji je vijećnicima stavljen samo na uvid, te Plan implementacije strategije lokalnog razvoja Grada Gračanica za 2020. godinu. Razmatrano je i usvojeno nekoliko izvještaja

o radu organa i službi u prethodnoj godini: o rješavanju upravnih stvari u upravnom postupku u Službama za upravu Grada Gračanica, o radu Gradskog vijeća Gračanica i radnih tijela (Komisija) i o anketiranju građana o zadovoljstvu radom Uprave i radom Gradskog vijeća.

1. 2. 2020.**Organizacija SDA Gračanica nakon četiri godine Povjereništva, izabrala sebi rukovodstvo**

Za predsjednika je izabran dr. Rahim Gadžić, poslanik SDA u Parlamentu FBiH, a za potpredsjednike: Almedin Devedžić, aktuelni vijećnik u Gradskom vijeću Gračanica, Adnan Muslimović, ljekar, specijalizant ginekologije i profesor Arif Imamović. Kako je izvijestio Radio Gračanica, novi predsjednik je poručio da će učiniti sve da SDA u Gračanici ponovo bude tamo gdje i pripada, a to je najjača politička opcija u Gračanici (Radio Gračanica).

4. 2. 2020.**Asfaltiranje, asfaltiranje: Lendići, Rašljeva...**

U Omerbašićima, MZ Rašljeva, asfaltirana je dionica prema Miričini (Brda). Dužina asfalta je 250 metara. U Lendićima je završena dionica dužine 100 metara. Vrijednost radova oko 40.000 KM.

12. 2. 2020.**U Vranovićima – izgrađen rezervoar za vodu, kapaciteta 100 kubnih metara**

Tim rezervoarom, koji je lociran pored regionalne ceste Bukva-Srebrenik, poboljšava se snabdijevanje vodom za mahale Meljani i Gornji Nasići. Na potezu od glavnog rezervoara do priključnog puta na regionalnu cestu ostavljen je jedan cjevovod za buduće potrošače i širenje naselja u tom rejonu. Vrijednost ovog projekta je cca 70.000 KM, a sredstva su obezbijeđena iz gradskog Budžetom. U režiji mjesne zajednice Vranovići na-

stavljeno je dalje širenje vodovodne mreže. Plan je da se riješi vodosnabdijevanje za još oko 40 domaćinstava.

12. 2. 2020

“Poslovne novine”: među najkompanijama u BiH, četiri iz Gračanice

“Poslovne novine” svake godine objavljuju informacije o najboljim i najuspješnijim bosanskohercegovačkim kompanijama u tri kategorije: 1. brzorastuće kompanije, 2. stotinu najvećih kompanije i 3. najpouzdanije kompanije. Sumirajući rezultate u sve tri kategorije (projekata), “Poslovne novine” promovisale su “zvijezde poslovnog neba u BiH”. To su one kompanije koje su rangirane u sve tri spomenute kategorije. Takvih je u čitavoj državi za prošlu godinu evidentirano svega 107, među kojima su i 4 kompanije iz Gračanice: Motorex, RPC Superfos Balkan, Bema Ba i HST CNC Technik. (informacija Radio Gračanice)

13. 2. 2020.

Umro Osman Brkičević – istaknuti privrednik iz Gračanice


Osnovnu školu i gimnaziju završio je u Gračanici, a Višu pedagošku školu u Tuzli. Svoj radni vijek počeo je kao nastavnik u Stocu, potom u Miričini, a od 1974. godine u rodnom Malešićima, gdje je od 1979. do 1981. godine bio i na funkciji direktora. Od 1981. prelazi s porodicom u Gračanicu, gdje nastavlja rad kao šef poslovnice socijalnog osiguranja. Njegov društveni angažman počeo još u omladinskim danima, a posebno dolazi do izražaja na funkciji predsjednika mjesne zajednice Malešići u periodu od 1974. do 1981. godine. Za njegovog mandata Malešići su povezani asfaltom sa Gračanicom, izgrađena je nova škola, stanovi za prosvjetne radnike itd. Po dolasku u Gračanicu, uključuje se u rad organa Mjesne zajednice. Posebno se istakao u velikoj akciji uređenja i rekonstrukcije centralne ulice u Gračanici 1988.–1989.

godine. Negdje pred sami rat, u periodu 1990-1991, obavljao je i dužnost predsjednika mjesne zajednice. Čitav rat proveo je s porodicom u Gračanici, gdje je u početnom periodu bio jedno vrijeme na dužnost komandanta Štaba civilne zaštite Mjesne zajednice Gračanica. Nekoliko godina nakon rata odlazi u mirovinu, posvećuje se porodici i sa sinovima razvija porodičnu firmu za otkup i preradu kože, koja je stekla reputaciju većeg izvoznika s područja općine Gračanica. Iznenadna smrt zatekla ga je u 73 godini života. Ukopan je 15. 2. 2020. godine na mjesnom greblju Režići.

19. 2. 2020.

“Fining” d.o.o Gračanica povećao izvoz dizalica čak za 50%

Pod tim naslovom na stranicama “Poslovnih novina” Sarajevo, u broju od 6. 2. 2020. objavljena je još jedna uspješnu gračaničku biznis priču. Iz tog članka prenosimo samo nekoliko podataka: počelo se 2003. godine sasvim skromno, sa svega 2 radnika kao privredno društvo za prodaju rabljene opreme za građevinarstvo, posebno kranskih dizalica njemačkih proizvođača. Danas zapošljava 60 radnika mašinske i elektro struke, od kojih veći broj visokokvalifikovanih majstora i inženjera, koji su ovladali proizvodnjom mosnih i portalnih dizalica, njihovom rekonstrukcijom i modernizacijom. Prošla godina je bila najuspješnija od osnivanja firme izjavio je za “Poslovne novine” direktor Midhat Čehajić: “Proizvedeno je i kupcima isporučeno 98 mosnih i portalnih dizalica i povećan ukupan promet sa 5,2 na 6,2 miliona u 2019. godini, Uloženo je i 550.000 KM za nabavku opreme, između ostalog i CNC lasera za rezanje 25-milimetarskog lima, te šest savremenih aparata za zavarivanje.” Po red domaćeg tržišta, firma je u prošloj godini ostvarila značajan izvoz–u Sloveniju u vrijednosti od oko 400.000 i Srbiju oko 770.000 eura (<https://poslovnenovine.ba>)

19. 2. 2020.**Napustio nas je zauvijek “Zlatni ljiljan” Ibrahim Hodžić-Čelap**

Tužna vijest iz daleke Amerike, gdje se ovaj heroj odbrane BiH posljednjih desetak godina skrasio s porodicom, i kako kažu, solidno bio skućio, iznenadila je mnoge njegove saborce, komšije, prijatelje, rodbinu. Rođen je 1. 8. 1975. godine u Lukavici, gdje je proveo ranu mladost i dječastvo koje je naglo prekinuo rat. U proljeće 1992. godine, kao šesnaestogodišnjak, uključuje se u prvu Lukavičku četu koja je branila svoje selo od četničkih nasrtaja iz pravca susjednih Skipovaca i već okupirane Grapske i Sjenine. Nakon formiranja jedinica Armije Republike Bosne i Hercegovine, kada su ga zbog nedovoljnog broja godina pokušali poslati kući, uputio se u Gradačac i stupio u redove legendarne 107. viteške brigade. Učestvovao je u najtežim bitkama za odbranu Gradačca, potom se vratio u Gračanicu i odmah stupio u redove 111. brdske brigade (Gračaničke). Osim gračaničkog, prošao je i druga teška bojišta, na koje je 111. brigada upućivana kao ispomoć. Na olovskom bojištu bio je i teško ranjen, ali je svojevrijedno napustio bolnicu i još nezaliječen stupio u redove 212. bosanske oslobodilačke brigade, prošavši i sa njom kroz najteže okr-

šaje. Ratno priznanje “Zlatni ljiljan” dobio je 1994. godine. Jedan je od najmlađih dobitnika tog ratnog priznanja u Armiji Republike Bosne i Hercegovine. Kako su ga životni putevi odveli čak do daleke Amerike posebna je priča. U trenutku kada je stigla tužna vijest u njegovu rodnu Lukavicu, niko nije znao kada će se i gdje će se ukopati najmlađi “Zlatni ljiljan” A BiH s područja Grada Gračanice, a možda i BiH. Želja svih je bila da bude ukopan u rodnoj Lukavici i da konačan smiraj nađe među svojimima.

26. 2. 2020.**Prva reakcija lokalnih (gradskih) vlasti u Gračanici povodom pojave korona virusa: Formiran krizni štab i održana vanreda sjednica Zdravstvenog savjeta Grada**

Zadatak Kriznog štaba je da sprovodi mjere pojačanog epidemiološkog nadzora u skladu sa Zakonom o zaštiti stanovništva od zaraznih bolesti FBiH i Zakonom o zdravstvenoj zaštiti FBiH, da prikuplja informacije i koordinira aktivnosti sa Federalnim kriznim štabom i Kriznim štabom TK za korona virus, kako bi se u slučaju potrebe preduzele potrebne mjere za sprečavanje i suzbijanje potencijalnih opasnosti po život i zdravlje naših građana. Istog dana, na vanrednoj sjednici Zdravstvenog savjeta Grada, proširenoj sa odgovorim licima Doma zdravlja Gračanica razmatrana je epidemiološka situacija na području Grada. Konstatovano je da su javne zdravstvene ustanove “preduzele potrebne mjere rane detekcije korona virusa, prema uputama Federalnog Ministarstva zdravlja.” Usvojeno je i nekoliko zaključaka i praktičnih preporuka, koje su putem medija saopćene građanima. U prvom redu pozvani su svi bosanskohercegovački građani, “koji imaju stalni ili privremeni boravak u FBiH, odnosno Gračanici, a koji su se u posljednjih 7-10 dana vratili u BiH i Gračanicu iz Kine, Irana, Južne Koreje i Italije, da se jave u Službu hitne medicinske pomoći Doma zdravlja

Gračanica, bez obzira da li imaju simptome respiratorne bolesti ili ne, a radi uzimanja epidemioloških podataka i savjetovanja o daljem postupanju. Do tada se savjetuje kućna samoizolacija (...) Preporučuje se građanima Gračanice da izbjegavaju putovanje izvan Bosne i Hercegovine. Ovo se posebno odnosi na turistička putovanja izvan BiH, povodom Dana nezavisnosti i osmomartovskih praznika, kongresa, sajмова, seminara i slično.” Dato je i nekoliko praktičnih savjeta s ciljem smanjenja rizika od akutnih respiratornih i drugih infekcija (poput gripe), čija je sezona u toku, a koji se odnose i na smanjenje rizika od korona virusa (često pranje ruku, prilikom kašljanja ili kihanja obavezna upotreba maramice koja se nakon upotrebe baca, izbjegavanje dodira očiju, lica, nosa, usta neopranim rukama, izbjegavati blizak kontakt sa osobama koje imaju simptome gripe, držati socijalnu distancu, izbjegavati okupljanja i javne skupove itd.

27. 2. 2020.

Asfaltiranje, asfaltiranje: Soko, Lukavica, Lukavica...

U Sokolu je asfaltiran seoski put u dužini od 225 metara (mahala Čajići) u vrijednosti od 22.000 KM. U Lukavici je asfaltiran sokak u mahali Šašovka, dužine 140, a širine 2,8 metara u ukupnoj vrijednosti od 14.000 KM. Time Gradska uprava završava projekte koji su planirani i ugovoreni u prošloj, 2019. godini.

27. 2. 2020.

Uređenje kanala za odvođenje oborinskih voda od Doma kulture do mahale Bajići u Donjoj Orahovici

Radi se na betoniranju korita kanala sa betonskim poklopcima u dužini od 261 metar, koji će prihvatati dio oborinskih voda iz mahale Bajići i odvoditi u kanal pored magistralne ceste M 4 Doboj-Tuzla. Time će se smanjiti mogućnost plavljenja kuća u tom dijelu sela koje se često dešavalo prilikom ja-

čih padavina. Vrijednost ovog projekta je oko 40.000 KM.

27. 2. 2020.

Deseta sjednica Gradskog vijeća: Izvještaj Gradonačelnika, stanje bezbjednosti...

Prije početka sjednice učenjem Fatihe odata je počast nedavno preminulim braniocima Bosne: komandantu slavne 121. brigade Bahriji Džananović i najmlađem nosiocu najvišeg ratnog priznanja “Zlatni ljiljan” Ibrahimu Hodžiću. Potom je pročitano saopćenje Gradskog savjeta za zdravstvo u vezi sa preventivnim mjerama, vezanim za pojavu korona virusa u našoj zemlji i okruženju. Između ostalog, Vijeće je razmatralo Izvještaj o realizaciji programa rada, ostvarivanju politike Grada i aktivnostima Gradonačelnika za 2019. godinu. Iz tog obimnog i nepotrebnom statistikom opterećenog, dosta nepreglednog materijala izdvajamo, radi ilustracije izdvajamo samo podatak da je nezaposlenost smanjena sa 7881 nezaposleno lice, krajem 2018. godine, na 6948 nezaposlena lica krajem 2019. godine. Za svaki slučaj navedeno je da su svi ciljevi ostvareni i da je postignut napredak u gotovo svim oblastima. Prema prezentiranoj Informaciji o stanju bezbjednosti, u prethodnoj godini nije bilo loše stanje ni u toj oblasti, čak šta više, “stanje javnog reda i mira takođe (je) zadovoljavajuće i mnogo bolje i povoljnije u odnosu na 2018. godinu.”

29. 2. 2020.

Obavljena dženaza rahmetli Ibrahimu Hodžiću, najmlađem dobitniku najvišeg ratnog priznanja “Zlatni ljiljan” iz Lukavice

Trebalo je punih 10 dana da se njegovi posmrtni ostaci dopreme u rodnu Bosnu. Komemoraciji i dženazi prisustvovao je veliki broj njegovih saboraca, sugrađana, članova porodice i prijatelja. Komemoracija je upriličena u organizaciji koordinacije boračkih organizacija i udruženja 212./222. oslobo-

dilačke brigade ARBiH u mjesnoj zajednici Lukavica. Ukopan je u mjesnom greblju Ograđenica.

11. 3. 2020.

Korona: Odlukom Kriznog štaba F BiH obustavlja se nastava u svim osnovnim i srednjim školama i na fakultetima, održana sjednica Kriznog štaba Grada Gračanice

...sa koje je poručeno građanima da nema potrebe za paniku, ali da treba poduzimati preventivne mjere koje propisuju nadležni organi. Upućena je molba građanima koji preuzimaju recepte i lijekove da u Dom zdravlja šalju mlađe članove porodica. Pregledi se zakazuju za tačno vrijeme kako se na hodnicima ne bi stvarale gužve. Ponovo se apeluje na građane koji dolaze iz zemalja kao što su Italija, Kina i ostale zemlje u kojima postoji mogućnost zaraze od korona virusa da se telefonom jave u Dom zdravlja za pregled i dalju proceduru. Moglo se čuti da su trenutno u Gračanici samo 3 osobe u kućnoj izolaciji, dok je za sve osobe za koje je ranije bilo izdato rješenje, karantin istekao 10. marta. Dogovoreno je da se odštampa dovoljan broj brošura i letaka sa uputama za građane kako će se ponašati u trenutnoj situaciji, kako smanjiti rizik od infekcije korona virusom i koga pozvati ukoliko primijete simptome, te da te obavijesti budu vidljive na svim javnim mjestima kao i u medijima. Krizni štab je uputio Gradonačelniku prijedlog da u skladu sa svojim ovlastima naredi otkazivanje svih predstava, koncerata i većih skupova za narednih mjesec dana, uključujući i najavljeni Sajam poduzetništva "Grapos-expo 2020." Dogovoreno je da se uputi poseban dopis sa uputama za postupanje u uslovima pandemije Udruženju poslodavaca, bankama, Socijalnom i svim drugima koji rade sa strankama i većim brojem ljudi.

12. 3. 2020.

Otkazan Sajam poduzetništva "Grapos-expo 2020", koji je trebalo da se održi od 14. – 17. aprila, 2020.

To je siže zajedničkog saopštenja Kabineta Gradonačelnika Grada Gračanica i DOO "Boms-expo" kao organizatora Gračaničkog sajma. Odluka je u skladu sa preporukom Ministarstva zdravstva Federacije BiH, ostalih institucija, te Kriznog štaba Grada Gračanica, koja se odnosi na ograničenja javnih okupljanja radi sprečavanja širenja korona virusa. Zdravlje svih je najpreče.

12. 3. 2020.

Šta je sa zatvorenim Hotelom "Tilia" u centru Gračanice?

Hotel "Tilia" (nekada hotel "Park") izgrađen je i otvoren 1956. godine i od tada je na neki način bio simbol grada. Više puta je obnavljan, "preživio" je rat, privatizaciju... Zbog teškoća u poslovanju, već više od godinu dana je zatvoren, pa su se oko njegove daljnje sudbine pojavile razne špekulacije u javnosti i lokalnim medijima... Počela su stizati i upozorenja da bi taj objekat, ukoliko se ne pokrene, mogao postati ruglo grada. Napokon, su se oglasili iz kompanije "Plamingo" i razjasnili sve te nedoumice. Između ostalog, saopštili su da je "Plamingo" kupio hotel s namjerom da na toj lokaciji napravi puno kvalitetniji, sadržajniji, funkcionalniji objekat koji će svojim novim izgledom i sadržajem privući posjetioce i oživjeti gračaničku čaršiju. Nakon obavljenih konsultacija sa Gradskom službom urbanizma "Plamingo" je angažovao vrhunskog arhitekta Amira Vuka za izradu idejnog rješenja budućeg hotela. Nakon toga ušlo se u postupak izdavanja urbanističke saglasnosti. Postupak usaglašavanja sa nekim susjedima potrajao je duže nego što se očekivalo. Jedna žalba još uvijek je u postupku rješavanja na višim organima. Dok se ta žalba ne riješi, sve ostalo je "na čekanju". Što se tiče investitora, stari hotel bi već bio srušen i uveliko bi se radio novi, poručio je

Samir Ćurić, vlasnik "Plaminga", koji je kupio "Tiliu". Svi su mišljenja da bi nadležni u tom postupku morali biti ažurniji. Novi hotel u centru grada želja je i investitora i privrednika i građana Gračanice.

12.3.2020.

Asfaltiranja, asfaltiranje: Škahovica...

Završeno je asfaltiranje puta u mahalama Smajići-Ahmetagići. Vrijednost projekta je oko 46.000 KM, a sredstva su obezbjeđena iz Budžeta grada, uz učešće mještana. Odmah su nastavljeni radovi i na asfaltiranju platoa ispred Doma kulture. Vrijednost tih radova je oko 10.000 KM.

13. 3. 2020.

Korona: apel Kriznog štaba Gračanica da se striktno provode naložene mjere viših organa

Pozivajući se na naredbe Federalnog i Kantonalnog kriznog štaba (od 12. 3.), Krizni štab Gračanica obavezao je Službu za civilnu zaštitu Grada Gračanica da upozna građane i privredne subjekte putem medija i na druge načine o suštini mjera koje su donijeli ti krizni štabovi. To se, prije svega odnosi na pojavljivanje mjere zaštite, obavezu javljanja građana koji dolaze iz inostranstva nadležnim zdravstvenim ustanovama itd.

13. 3. 2020

Apel građanima u vezi sa radom Gradske uprave

"Poštovani građani, molimo vas da se u cilju suzbijanja širenja virusne zaraze pridržavate uputa o kretanju, nepotrebnom zadržavanju u javnom prostoru i obaveznoj uputi dezinficiranja prilikom posjete Gradskoj upravi, a u cilju sprečavanja širenja virusa, prvenstveno zaštite zdravlja svih građana..."

16. 3. 2020.

Korona: preporuke Kriznog štaba Federacije BiH za sve poslovne subjekte, samostalne obrtnike, organe

vlasti na nivou Federacije Bosne i Hercegovine, kantona, gradova i općina, udruženja i fondacija...

U januaru 2020. godine Svjetska zdravstvena organizacija (SZO) je proglasila javno zdravstvenom vanrednom situacijom od međunarodnog značaja epidemiju novog korona virusa, koja je počela u Kineskoj provinciji Hubei. Postoji visoki rizik da se oboljenje uzrokovano novim korona virusom (COVID-19) proširi i na druge zemlje širom svijeta, uključujući i Bosnu i Hercegovinu. SZO i javnozdravstveni autoriteti širom svijeta poduzimaju aktivnosti koje su usmjerene na suzbijanje širenja COVID-19. Međutim, svi segmenti našeg društva – uključujući poslodavce i uposlenike, moraju uzeti aktivno učešće ako želimo zaustaviti tu bolest. U preporukama se dalje objašnjava kako treba pripremiti svoje radno mjesto za COVID-19, kako se širi COVID-19, koji su načini sprečavanja širenja COVID-19 na radnim mjestima, kako organizovati eventualno putovanje u uslovima pandemije, šta uraditi nakon povratka s puta, te kako reagovati ukoliko se COVID-19 pojavi u našoj lokalnoj zajednici. Preporuke se završavaju sljedećim apelom i važnom napomenom: "Zapamtite, sada je vrijeme da se pripremimo za COVID-19. Jednostavne mjere opreza i planiranje mogu napraviti veliku razliku. Sve što sada poduzmete može pomoći da zaštitite vaše uposlenike i vaš radni proces. Naglašavamo da će se mjere i preporuke mijenjati u ovisnosti od razvoja situacije..."

16. 3. 2020.

Korona: po nalogu iz TK, zatvaraju se kafići, tržni centri, kladionice, marketi će raditi do 18.00 sati..

U skladu sa naredbama Federalnog kriznog štaba, a u cilju sprečavanja pojave i eventualnog prenošenja korona virusa, Krizni štab Ministarstva zdravstva Tuzlanskog kantona donio je naredbu kojom se, osim zabrane rada ugostiteljskih objekata i tržnih centara,

zabranjuje održavanje svih javnih i privatnih skupova i proslava i drugih okupljanja, nadalje, obustavlja se rad kulturnih institucija (kina, muzeja, pozorišta, umjetničkih galerija i sl., odmah se obustavlja i rad javnih bazena i kupališta, sportskih centara, spa centara, fitnes centara i sl. na području Tuzlanskog kantona u trajanju od najmanje 15 dana od dana donošenja ove naredbe, obustavlja se rad svih ugostiteljskih objekata za pripremanje i prodaju hrane i pića: restorana, pizzeria, slastičarni, čevabdžinica, nargila barova, caffè e bistro barova, klubova, diskoteka, kazina, sportskih kladionica, rad kafića u sklopu benzinskih pumpi i sl. (od ove naredbe se izuzimaju oni ugostiteljski objekti koji se, pismenim putem prema Kriznim štabovima gradova/općina, izjasne da će obavljati isključivo dostavu hrane, uz pridržavanje mjera zaštite i fizičkog razmaka prilikom dostavljanja hrane i pića, s tim da i dalje ne smiju služiti hranu i piće u objektu, niti primati goste u objekte); obustavlja se rad svih shopping tržnih centara, frizerskih i kozmetičkih salona i sl.; zabranjuje se rad "buvljih", sedmičnih pijaca, autopijaca i sličnih, dok se rad zelenih pijaca i pijlara dozvoljava uz poštovanje preventivnih higijensko-epidemioloških mjera; pod istim uslovima dozvoljava se rad trgovina osnovnim prehrambenim artiklima (supermarketi, hipermarketi, pekare, apoteke, benzinske pumpe) do 18 sati; nalaže se svim lokalnim samoupravama, kantonalnim upravama, privrednim društvima, fizičkim i pravnim licima da pojačaju provođenje opštih i posebnih mjera zaštite stanovništva od zarazne bolesti, sa posebnim naglaskom na pojačanu vanrednu dezinfekciju poslovnih površina, sredstava javnog prevoza (autobusi, taxi vozila, kombi vozila); zabranjuje se okupljanje na javnim igralištima, igraonicama, parkovima i drugim javnim površinama. Sve ove i niz drugih mjera odnose se na područje TK u trajanju od najmanje 15 dana od dana donošenja ove naredbe (izvor: RTV Slon)

16. 3. 2020.

Apel Doma zdravlja Gračanica u vezi sa korona virusom (COVID-19)

Dom zdravlja Gračanica javnim apelom poziva sve osobe koje su se vratile iz inostranstva sa ugroženih područja epidemijom da se odmah jave u Epidemiološku službu Doma zdravlja na pregled i dalji tretman. Javno su saopšteni i kontakt telefoni, te druga uputstva i upozorenja.

17. 3. 2020.

Korona: na području Tuzlanskog kantona škole počele s on line nastavom, za niže razrede nastava u programu RTV TK

Prema izvještaju RTV TK, prvi radni dan ove sedmice nastavnici u Tuzlanskom kantonu dočekali su u školama, a učenici uz računare i mobitele u svojim domovima. U skladu sa smjernicama resornog Ministarstva za obrazovanje i nauku i prema preporukama Pedagoškog zavoda Tuzlanskog kantona, škole su počele postepeno organizovati nastavu preko interneta za svoje učenike. Za učenike koji nemaju pristup internetu, roditelji će moći fizički preuzimati školske zadatke za svoju djecu. U srednjim školama s on line nastavom imaju više iskustva.

17. 3. 2020.

Proglaseno stanje nesreće za područje F BiH, koordinaciju i upravljanje nad stanjem epidemije preuzima Gradski štab civilne zaštite Grada Gračanica

To je na sjednici Kriznog štaba saopćio Gradonačelnik Nusret Helić, nakon povratka sa vanredne sjenice u Vladi TK koja je i održana povodom Odluke Vlade F BiH u vezi sa proglašenjem stanja nesreće, uzrokovane pojavom korona virusa (COVID-19) na području Federacije Bosne i Hercegovine i opasnosti od širenja zarazne bolesti na području Tuzlanskog kantona.

17. 3. 2020.**Korona: nema povećanja cijena prehrambenim, sanitarnim i drugim artiklima tokom krize**

Federalna vlada donijela je Odluku kojom uvodi neposrednu kontrolu cijena na području Federacije Bosne i Hercegovine, a kao mjeru te kontrole propisala je za pojedine proizvode zadržavanje cijena na zatečenom nivou. Privredna društva i druge pravne i fizičke osobe koje obavljaju trgovinu naveliko i namalo, obavezni su primjenjivati cijene na nivou zatečenom 5. 3. 2020. godine. Na listi proizvoda na koje se primjenjuju mjere neposredne kontrole cijena su osnovni prehrambeni artikli, sredstva za zaštitu i održavanje čistoće i lične higijene. Za realizaciju i nadzor nad provođenjem ove odluke zaduženi su federalna, kantonalna, gradska i općinska tržišna inspekcija.

18. 3. 2020.**Saopštenje Vijeća muftija Islamske zajednice BiH – obustavlja se obavljanje dnevnih namaza u džematu, uče se samo ezani**

Vijeće muftija Islamske zajednice (IZ) u BiH odlučilo je da se zbog novonastalih okolnosti širenja koronavirusa i zaštite zdravlja ljudi do daljnjeg obustavi zajedničko obavljanje dnevnih namaza u džematu, s tim što će se ezani u džamijama i dalje učiti redovno. Za Islamsku zajednicu i njene pripadnike je iznimno važno da se simbolički očuva institucija džuma-namaza, pa džumu trebaju obavljati samo one džematlije koje će odrediti imam i džematski odbor, s tim što će njihov broj biti usklađen sa mjerama nadležnih organa. Vijeće apeluje da osobe koje spadaju u rizične skupine (starije osobe, hronični bolesnici itd.) ni u kom slučaju ne dolaze u džamiju. “Kako je svako vrijeme poteškoća istovremeno i vrijeme iskušenja, na vjernicima kao i na njihovoj Islamskoj zajednici je obaveza da pokažu solidarnost i da pomognu drugima, kako bi zajedno prebrodili ovu veliku kušnju.

U suočavanju s ovim izazovom ne može biti prostora za sebičnost i pohlepu bilo kojeg člana društva. Vijeće muftija podsjeća sve muslimane da je gomilanje robe i životnih namirnica, naročito ako se to radi kako bi se stvorio monopol i profitiralo, kao i vještačko dizanje cijena haram – strogo zabranjeno” (Izvor: MINA)

19. 3. 2020.**Započela izgradnja kolektora na rijeci Sokoluši pored objekta “Lido”**

Radi se o projektu “Izvođenje radova na zaštiti glavnog desnog kolektora kroz izgradnju regulacije korita rijeke Sokoluše –Faza II” u Gračanici. S obzirom da je proteklih godina sa regulacijom korita rijeke Sokoluše izgrađen glavni fekalni kanalizacioni kolektor, te kružni tok u tom rejonu, stvoreni su preduslovi za uređenje dijela korita rijeke Sokoluše na potezu most “Rampa” – most kod objekta “Lido” ukupne dužine od 145 metara. Vrijednost Ugovora za radove iznosi 386.505,07 KM. Projekat se finansira sredstvima iz Budžeta Grada, kao i sredstvima obezbijeđenim iz Fonda za zaštitu okoliša Federacije BiH i Švicarske Vlade u okviru MEG projekta kojeg provodi UNDP BiH. Izvođač je firma “Roading”, Gračanica.

20. 3. 2020.**Kantonalni štab Civilne zaštite ograničio jednokratnu kupovinu pojedinih proizvoda**

Naredio je trgovinama osnovnim prehrambenim artiklima da svoj rad organiziraju po do sada prijavljenom radnom vremenu, uz osiguranje protoka kupaca i klijenata tako da se omogućí potrebna socijalna distanca od najmanje 1,5 metara između osoba, uz poštivanje ostalih higijensko-epidemioloških mjera, te da ograniče jednokratnu kupovinu na maksimalno 25 kilograma brašna i 5 litara ulja po jednom kupcu kako bi se spriječila nestašica osnovnih životnih namirnica. (Gračanički.ba)

20. 3. 2020.

Gradski štab Civilne zaštite Gračanica saopštio: nema zaraženih, izolacija za 457 lica...

...dok su u toku jučerašnjeg dana testirane dvije osobe za koje se sumnjalo da su zaraženi virusom korona. Na svu sreću, oba nalaza su negativna. Policija provjerava sve osobe kojima je određena mjera izolacije. Tokom prethodnog dana kontrolisano je 195 lica, od kojih 7 nije zatečeno na adresi. Kontrolisani su i ugostiteljski objekti za koje se sumnjalo da rade uprkos naredbi o zabrani. Crveni križ grada Gračanica je oformio svoj štab te angažovao 8 volontera koji će obilaziti socijalno ugrožene, stare i iznemogle osobe koje se nalaze u izolaciji ili u stanju potrebe. "Komus" je izvijestio da je sve spremno za pranje i dezinfekciju ulica u gradu... Gradski štab ponovo je pozvao građane da se ponašaju odgovorno i u skladu sa naloženim mjerama nadležnih organa. S obzirom da jedan veći broj lica u izolaciji, kao i pojedini vlasnici ugostiteljskih objekata ne poštuju propisane mjere, upozoravaju se da će se protiv njih primijeniti sve zakonom propisane mjere.

21. 3. 2020.

Naredbom Federalnog štaba Civilne zaštite uvodi se policijski sat na čitavom području Federacije BiH od 18 do 5 sati ujutro

Naredba se ne odnosi na zaposlene koji su uključeni u provođenje mjera i aktivnosti u vezi sa proglašenim stanjem nesreće, uzrokovane pojavom korona virusa na području FBiH kao i zaposlena lica kojima se proces rada odvija u smjenama. Uvodi se potpuna zabrana kretanja osobama mlađim od 18 i starijim od 65 godina. Krizni štab RS-a za vanredne situacije donio je odluku o zabrani kretanja svih osoba u RS, u trajanju od 20 do 5 sati, a ova naredba stupa na snagu večeras.

23. 3. 2020.

Korona: na TK nema zaraženih – u izolaciji 4.776 lica

To je saopćila ministrica zdravstva TK Dajana Čolić i navela da je policija evidentirala 48 prekršilaca zabrane kretanja. Na korona virus testirane su 83 osobe i svi rezultati su negativni. Izolacija i socijalna distanca, uz poštovanje izrečenih mjera i preporuka, kako je saopćila dr. Čolić, predstavlja ključnu mjeru u suzbijanju zaraze.

23. 3. 2020.

Korona: za 660 osoba u Gračanici izdato rješenje o izolaciji

Testirane su tri osobe na prisustvo virusa i sve tri su bile negativne. Od 59 lica koja su službenici Policijske stanice Gračanica provjeravali u vremenu od 10 sati prethodnog dana do 9 sati jutros, svi su se pridržavali naloženih mjera. Od sinoć je na području FBiH, na snagu stupila zabrana kretanja svih osoba u vremenu od 18:00 do 05:00 sati. Iz MUP-a TK ističu da svi koji se ove naredbe ne budu pridržavali mogu biti prekršajno sankcionisani. (Radio Gračanica)

23. 3. 2020.

Korona: Gradski štab Civilne zaštite konkretizovao mjere sa viših nivoa vlasti

(1) Zadužuje se Služba za poduzetništvo, finansije i lokalni razvoj da odmah dostavi izmjenjene naredbe (zajedno sa izvornom naredbom) firmama koje vrše ugovoreni prevoz, servisima motornih vozila i prodavnicama rezervnih dijelova za motorna vozila i prodavnice i servisi računarske opreme, sa upozorenjem da se pridržavaju preporuka (razdaljina, dezinfekcija i drugo); (2) Centar za socijalni rad u saradnji sa Osnovnom organizacijom Crvenog križa Gračanica dužan je odmah otpočeti sa dodjelom jednokratne pomoći za najugroženije. U te svrhe se Centru za socijalni rad odobravaju sredstva u iznosu od 15.000 KM; (3) Preporučuje se

Udruženju penzionera Grada da već pripremljeni projekat jednokratnih pomoći penzionerima iz Budžeta Grada provedu odmah, a ne krajem godine kao do sada; (4) Gradski štab civilne zaštite od obje zdravstvene ustanove traži da hitno dostave podatke o stanju i potrebnim sredstvima za zaštitu ljekara i osoblja (maske, zaštitna odjela, testovi, respiratori i dr.); (5) Zadužuju se vijeća mjesnih zajednica i predsjednici da izvrše dezinfekciju javnih objekata i površina, te da se aktivnije uključe u pružanje pomoći starijim i bolesnim sugrađanima, posredstvom Centra za socijalni rad i Crvenog krsta Gračanica; (6) U cilju provođenja naredbi o uvođenju policijskog sata, obavezuju se sva pravna lica u kojima se proces odvija u dvije i više smjena da svojim zaposlenicima izdaju ovjerenjena uvjerenja (potvrde) o tom statusu i spiskove dostave PU Gračanica. Isto važi i za javne ustanove, javna preduzeća i dr. Svaka zloupotreba je kažnjiva; (7) Gradski štab civilne zaštite poziva sve građane na poštivanje i provođenje preventivnih mjera.

24. 3. 2020.

Korona: Pomozimo Gračanici u borbi protiv COVID-19!

Grad Gračanica uputio je javni poziv svim svojim građanima u BiH i inostranstvu kao i svim prijateljima da se uključe u akciju prikupljanja pomoći u borbi protiv pandemije virusa COVID-19. Gračanica, kao i cijela BiH i njeni građani ovih dana suočavaju se sa jednim od najvećih izazova u zadnjih 25 godina, kaže se u pozivu. Osim odgovornosti svakog pojedinca u poštovanju mjera, preporuka i naredbi, od velike pomoći u ovim teškim trenucima mogu biti kompanije, privrednici i dijaspora. Svaki doprinos u novcu i proizvodima od velike je pomoći onima kojima je najpotrebnija. Javno je saopćen i žiro račun na koji se mogu vršiti novčane uplate.

24. 3. 2020.

Na području Gračanice nije potvrđen još niti jedan slučaj zaraženih osoba korona virusom dok se...

...706 nalazi u kućnoj izolaciji, što je u odnosu na dan ranije povećanje za 46 osoba, saopšteno je na sjednici Gradskog štaba Civilne zaštite. U većini slučajeva se poštuju naredbe i propisi, ali ima i neodgovornih. Tako su službenici PS Gračanica napisali dvije prekršajne prijave za osobe koje se nisu pridržavale naredbe o zabrani kretanja od 18 do 5 ujutro. Kada je u pitanju Tuzlanski kanton, više od 5000 osoba je u kućnoj izolaciji. Do danas su testirane 83 osobe i nalazi su kod svih negativni. Za sada, dakle, ni u Tuzlanskom kantonu nema zaraženih. U BiH je do sada registrovano 153 zaraženih i, nažalost, drugi smrtni ishod. Zaključeno je da Služba nabavi 1000 maski za lica koja su u funkciji zaštite od korona virusa, da sačini registar svih mjera koje su poduzete na području zaštite u cilju ublažavanja i zaštite od epidemije, tu je još nekoliko konkretnih zaduženja šefovima službi gradske uprave, Doma zdravlja, policije i dr. (Radio Gračanica).

26. 3. 2020.

Korona: u apotekama ima rukavica i sredstava za dezinfekciju – nema maski za lice...

...izvijestio je reporter Radio Gračanice, uz napomenu da se stanje razlikuje od apoteke do apoteke. U Gradskoj apoteci mogu se kupiti sredstva za dezinfekciju po cijeni od 4,60 KM za pola litra. Također ima i rukavica, s tim da jedna osoba može kupiti najviše 10 komada. Slična je situacija i u apoteci Ibn Sina, gdje se mogu kupiti rukavice i sredstva za dezinfekciju, ali nema maski za lice.

27. 3. 2020.

Sjednica Gradskog Štaba Civilne zaštite Gračanica: mjera izolacije

određena za 777 osoba, određene prostorije za uređenje izolatorija...

Sportska sala u Gračanici će se urediti za smještaj lica bez simptoma ili sa slabijim simptomima zaraze, dok će se prostor bivšeg disko kluba (sada Udruženje Anea) u Domu kulture Gračanica urediti za smještaj lica za koja se utvrdi da ne poštuju mjere izolacije, naređene rješenjem sanitarnog inspektora. Zaduženi su "Komus" i obje zdravstvene ustanove da obave sve što je potrebno kako bi se stavio u funkciju objekat mrtvačnice u blizini Doma zdravlja. Gradski štab obezbijedio je sredstva za nabavku 500 testova na korona virus. Iz Udruženja poslodavaca Gračanica, obavijestili su da pokreću akciju prikupljanja pomoći, u prvom redu za zdravstvene ustanove i druge potrebe prema ocjeni Štaba.

27. 3. 2020.

Prvi potvrđeni slučajevi testiranih na korona virus u Tuzlanskom kantonu.

Tuzlanski kanton do 27. 3. 2020. nije imao ni jedan pozitivan slučaj zaraze korona virusom. Sa današnjim danom potvrđene su kao "pozitivne" prve dvije osobe, jedna iz Lukavca i jedna iz Tuzle, dok je u kućnoj izolaciji 4.836. Do sada je u Zavodu za mikrobiologiju UKC-a urađeno 168 testova na korona virus. Nakon prva dva potvrđena slučaja zaraze, ministrica zdravstva TK Dajana Čolić je izjavila: "Nakon 21 dana, nakon prvog oboljelog u BiH, danas smo dobili dva pozitivna rezultata, jedno lice je sa područja Lukavca drugo iz Tuzle. Jedna osoba je bila ranije na putovanju, nalazi se od ranije u samoizolaciji, a kod druge se sada radi epidemiološka analiza." Istakla je da nema razloga za paniku i da su zdravstveni radnici spremni za "ovu situaciju". (Tuzlarije.net)

28. 3. 2020.

Virus "Korona" širi se u Tuzlanskom kantonu

Radi se o još sedam novih potvrđenih slučajeva zaraze, tako da ih je sa današnjim danom

ukupno devet. "Tuzlanski slučaj" se vezuje za medicinsku sestru iz Medicinskog instituta Bayer (nekadašnji Centar za srce), za koji se pretpostavlja da je zaražen virusom.

30. 3. 2020.

Gradski štab Civilne zaštite saopštio: prvi zaraženi od korona virusa u Gračanici

Riječ je o muškarcu, čija se zaraza povezuje sa klastrom Medicinski centar za srce Bayer u Tuzli. Saopšteno je da je zaraženi odmah stavljen u izolaciju, zajedno sa članovima porodice, te da se radi na verifikaciji njegovih kontakata...Preduzimaju se i druge mjere (npr. u njegovom preduzeću) radi sprečavanja daljeg širenja zaraze. Inače, mjere izolacije na području grada određene su za 649 osoba, dok je za 334 osobe vrijeme kućne izolacije isteklo. Policija je u danima vikenda kontrolisala 297 osoba kojima je određena izolacija, 7 lica je kršilo zabranu kretanja u toku dana (mlađi od 18 i stariji od 65), a za dvije osobe je izdat prekršajni nalog zbog kretanja za vrijeme policijskog sata. Gradski štab ponovo je pozvao sve građane na poštivanje i provođenje preventivnih mjera zaštite od korona virusa, te da prijave eventualne kontakte sa osobama pozitivnim na korona virus kako bi se mogle poduzeti dodatne zdravstvene mjere.

31. 3. 2020.

Održana 11. sjednica Gradskog vijeća Gračanica: u potpuno vanrednim okolnostima

Radi svih mjera zaštite (dezinfekcija, maske, rukavice) i radi omogućavanja propisanog razmaka, sjednica nije održana u Sali Općinskog vijeća (nova općina), već u velikoj sali Bosanskog kulturnog centra. Povod za sazivanje i održavanje sjednice je bilo usvajanje izmjena i dopuna Poslovnika Gradskog vijeća, kojim bi se omogućilo održavanje sjednica vijeća elektronskim putem ili telefonski zbog novonastale vanredne situacije, te radi

usvajanja nekih odluka, čije je ranije vađenje vezano za kraj marta tekuće godine i u cilju rješavanja konkretnih zahtjeva građana. U takvom ambijentu (vijećnici i prateće osoblje, razbacani po velikoj Sali, sa maskama i rukavicama) bez ikakve rasprave usvojena je već spomenuta Odluka o izmjenama i dopunama poslovnika Gradskog vijeća Gračanica kojom se omogućavaju "elektronske ili telefonske sjednice Vijeća u vanrednim okolnostima kako ne bi dolazilo do blokade funkcionisanja organa lokalne uprave." Povodom izvještaja o izvršenju Budžeta za 2019. i korišćenju budžetske rezerve u tekućoj godini, Gradonačelnik Helić je rekao: "Pokazatelji izvršenja su zaista dobri. Bili smo krajnje odgovorni i racionalni u potrošnji, te ostvarili velike uštede. Upravo ovo krizno vrijeme će pokazati koliko smo bili u pravu i možda će nam doprinijeti da krizu u kojoj se nalazimo lakše prevaziđemo. Drago nam je što smo većinu kapitalnih projekata iz 2019. u pretходna dva mjeseca realizovali". Pored ovih izvještaja, bez rasprave je usvojeno još nekoliko odluka, između ostalih: o izmjenama i dopunama Odluke o provođenju prostornog plana Gračanice, o utvrđivanju prosječne konačne cijene m² korisne stambene površine na području grada Gračanica i o utvrđivanju visine naknade za pogodnost gradskog građevinskog zemljišta (rente). Na kraju sjednice načelnik Gradskog štaba Civilne zaštite Mustafa Bajić upoznao je vijećnike o radu Gradskog štaba civilne zaštite i dao kratak presjek poduzetih aktivnosti u proteklom periodu.

1.4. 2020.

Donacije gračaničkih privrednika za nabavku opreme i sredstva za borbu protiv korona virusa

Za izolatorij u sportskoj dvorani Luke za smještaj pacijenata pozitivnih na COVID-19 sa blažom ili srednjom kliničkom slikom, kojim će u slučaju potrebe upravljati Dom zdravlja Gračanica, napravljeno je 50 zaseb-

nih jedinica, odnosno kreveta koje je donirala Humanitarna organizacija "Emmaus", dok je kompletnu posteljinu (jastuke, štedekke i komplet posteljine) donirala gračanička firma "Kanetex". U dvorani su obezbijeđeni i posebni ulazi za pacijente i medicinsko osoblje, ali i svi prateći tehnički sadržaji poput kantine, sobe za ljekare i slično. Ipak, u ovom trenutku svi se u Gračanici nadaju da ovaj izolatorij neće biti potreban i da će ostati kao odlično izvršena obaveza ove lokalne zajednice. Kad je riječ o donacijama, Udruženje poslodavaca prikupilo je donacije u vrijednosti od oko 100.000 KM, koje je najvećim dijelom usmjerilo prema zdravstvenim ustanovama. Tako je na primjer "Kovan" donirao dva tunela za dezinfekciju, a "Variplast" veći broj zaštitnih vizira za potrebe Doma zdravlja, a "Plamingo" dodijelio nekoliko kreveta za "Izolatorij" u BKC (bivši disko klub) za one koji ne budu poštovali propisane mjere samoizolacije..

1.4. 2020.

Ohrabrujuća vijest iz Doma zdravlja: nema novih zaraženih od Covid-19 u Gračanici

Kako su rekli za Radio Gračanicu, "još uvijek smo na jednom-jedinom pozitivnom pacijentu i neka tako i ostanu". Kod ostalih testiranih koji su bili u kontaktu sa zaraženom osobom, nalazi su, srećom, negativni. Broj lica koja se u izolaciji smanjio se na 516, dok je za njih 594 istekao period samoizolacije. Pripreme za eventualno pogoršanje stanja su u punom jeku. Dvorana "Luke" je spremna kao izolatorij za lakše zaražene, a u prostoru BKC (klub "Anea") spreman je karantin za one koji ne budu poštovali naredbe. (Radio Gračanica)

2.4. 2020.

Novi slučaj Korona virusa u Gračanici, ipak...

Tim povodom održana je hitna sjednica Gradskog štaba civilne zaštite Grada Grača-

nica. Usvojeno je nekoliko konkretnih zaključaka koji se odnose na pooštavanje mjera prevencije i kontrole zaraze u zdravstvenim ustanovama. Zaključeno je takođe da se od nadležnih zatraži dodatna sanitetska oprema za koju su već obezbijedena sredstva, da se vrši dodatna kontrola osoba koje su u izolaciji, a dovode se u vezu sa dva pozitivna lica na korona virus i da se uputi novi apel građanima da poštuju mjere izolacije i sve druge mjere kriznih štabova na svim nivoima.

3.4. 2020.

Asfaltiranje, asfaltiranje: Prijeko Brdo – Trnovci, Gornji Doborovci..

Završena sanacija i asfaltiranje tog puta koštalo je 27.000 KM, a sredstva su obezbijedena iz Budžeta Grada. U toku su i pripreme podloge i izgradnje potpornog zida za asfaltiranje poligona malih sportova u Gornjim Doborovcima.

4.4. 2020

Gradonačelnik Helić: apel i upozorenje građanima koji krše zabrane kretanja i zadržavanja na otvorenom prostoru na području grada Gračanica

Povodom masovnog kršenja naredbi o zabrani kretanja radi prevencije virusa, javnim apelom putem lokalnih medija građanstvu se obratio Gradonačelnik Nusret Helić u funkciji Komandanta Gradskog štaba civilne zaštite sljedećim apelom: "Poštovani! Dok se jedni građani pridržavaju mjera, drugi nezaustavljivo šetaju ne razmišljajući hoće li baš oni biti ti, koji mogu i ne znajući, nositi i širiti virus i otvoriti vrata bolesti ili još gore smrti. Prema informacijama sa terena da se u velikoj mjeri vrše okupljanja većeg broja ljudi u privatnim objektima, vikendicama, izletištim i slično, čime se krše Naredbe Federalnog štaba civilne zaštite o zabrani kretanja i zadržavanja na udaljenosti, manjoj od 1,5 metra na području Federacije, Gradski štab civilne zaštite ponovo upozorava građane: ostanite kod kuće, jer svaki kontakt predstav-

lja potencijalnu mogućnost za zarazu; zahtijevajte od svojih ukućana da budu odgovorni i ne idu na kućna druženja, okupljanja i sijela, te im skrenite pažnju da na taj način ugrožavaju sebe i svoje najbliže; ukoliko ste vi ili je neko od vaših kolega i ukućana imao kontakt sa nekim ko je potencijalno zaražen, ostanite kod kuće i javite se higijensko-epidemiološkoj službi; širenje zaraze može dovesti do velikog broja smrtnih slučajeva, zatvaranja firmi i ugrožavanje životne egzistencije – mislite na zdravlje i egzistenciju sebe i drugih; kršenje navedenih naredbi predstavlja kršenje Zakona o zaštiti stanovništva od zaraznih bolesti u FBiH, Krivičnog zakona Federacije BiH i drugim zakonima."

5.4. 2020

Federalni štab: privremeni prekid cjelodnevne izolacije za penzionere (preko 65 godina): od ponedjeljka 6. do petka 10. aprila mogu izaći i podići penzije u vremenu od 08. do 12.00 sati.

Što se tiče kretanja mladih od 18 godina, njima je dozvoljeno da se voze u automobilima sa roditeljima. Dakle, i dalje ostaje na snazi potpuna zabrana kretanja osobama starijim od 65 godina i mlađim od 18 godina (osim u navedenim terminima) kao i zabrana kretanja svim građanima od 20 h do 5h ujutro (policijski čas). Na građane se iz štabova i dalje apeluje da izbjegavaju bespotrebno izlaženje i kontakte s drugim osobama, a ukoliko moraju, da drže socijalnu distancu, te nose zaštitne rukavice i maske.

4 i 5. 4. 2020.

Asfaltiranje, asfaltiranje: poligon kod Osnovne škole "Hasan Kikić"

Projekat je obuhvatio i ostale radove na uređenju poligona (izradu dijela sokla za ogradu, postavljanje mreža i dr.) što će se završiti u narednim danima. Ugovorena vrijednost projekta je cca 27.000 KM, ali zbog dodatnih radova na vodovodu i kanalizaciji bit će nešto veća. Sredstva su obezbijedena iz

Budžeta Grada Gračanica i o.š. "Hasan Ki-kić". U svakom slučaju, učenici će imati bolje uslove za održavanje časova tjelesnog odgoja na otvorenom i za druge sportske aktivnosti.

7. 4. 2020.

Skromnije nego do sada, a prilagođeno aktuelnoj situaciji, obilježen 7. april – Dan oslobođenja Gračanice u Drugom svjetskom ratu

Gradonačelnik Nusret Helić i predsjedavajući Gradskog vijeća Nihad Krajinović položili su cvijeće i odali počast žrtvama na Spomen kosturnici i bisti Josipa Broza Tita u parku u centru grada, te na Centralnom spomen-obilježju kod gradske uprave. Tim povodom je Gradonačelnik Helić putem talasa Radio Gračanice poslao prigodnu poruku građanima.

8. 4. 2020.

Gračanica i dalje "ostaje" sa dva potvrđena slučaja pozitivnih na Covid-19.

U izolaciji se nalazi 449 lica, dok je za njih 878 izolacija istekla. Nakon testiranja 39 lica rezultat je 0 pozitivnih. Samo su 2 osobe mlađe od 18 godina (za protekla 24 sata) prekršile izrečene mjere zabrane kretanja. Kontrolisano je 40 ugostiteljskih objekata i svi su poštovali naložene mjere.

11. 4. 2020.

Na području Tuzlanskog kantona u posljednja 24 sata od testiranih 85 osoba, ni jedna nije bila pozitivna na korona virus.

Četiri osobe koje pripadaju klasteru neka-dašnjeg centra za srce, odnosno Medical Institut Bayer su se oporavile. Od 82 do sada otkrivena pozitivna slučaja, 78 je aktivnih. U uslovima kućne izolacije na području TK nalazi se 2198 osoba. U UKC-u Tuzla hospitalizirano je 20 osoba zaraženih virusom COVID – 19, dvije osobe su premještene u drugi kanton zbog nastavka liječenja, do sad

je zabilježen jedan smrtni ishod. S obzirom da su četiri pacijenta oporavljena, već se može govoriti o broju oboljelih i izliječenih. Od 78 osoba zaraženih osoba na TK, 53 su u kućnoj izolaciji. Što se tiče Gračanice, 422 osobe se nalaze u izolaciji, a za 928 je istekao taj period.

13. 4. 2020.

Prvi znak popuštanja: u TK dozvoljen rad trgovinama obuće i tekstila izvan tržnih centara

Kantonalni štab civilne TK donio je naredbu kojom se omogućava rad trgovinama obuće i tekstila koje se nalaze izvan tržnih centara. Donesena je i nova naredba kojom se građanima zabranjuje ulazak u apoteke. Radi zaštite osoblja apoteke, lijekovi će se izdavati kroz šaltere. Federalnom štabu CZ upućena je i inicijativa da se frizerskim salonima dozvoli rad, uz posebne mjere zaštite. Zatraženo je i hitno tumačenje naredbe Federalnog štaba CZ, po kojoj sve osobe koje uđu u BiH moraju u karantin. Traži se izuzimanje vozača i prekograničnih radnika iz ove naredbe. (Tuzlarije)

14. 4. 2020.

Ipak, nema "popuštanja": Federalni štab nije dao saglasnost...

...pa je Kantonalni štab civilne zaštite Tuzlanskog kantona stavio van snage svoju, prethodnog dana, donesenu naredbu, prema kojoj prodavnice obuće i tekstila koje nisu u tržnim centrima, mogu raditi.

16. 4. 2020.

U Gračanicima nema zaraženih: dvije osobe kod kojih je bio pozitivan nalaz na COVID-19 se oporavilo.

Prvi slučaj korona virusa u Gračanicima otkriven je kod muškarca mlađe životne dobi, 30. marta. Odmah nakon otkrivanja pristupilo se identifikovanju svih njegovih kontakata, te testiranju članova porodice, čiji su testovi, srećom bili negativni. Od tada je prošlo 18

dana, te je istekao prvi period izolacije prvo-zaraženog. Na ponovljenom testiranju njegov nalaz je bio negativan, "pa se može konstatovati da je *prvozaraženi pacijent iz Gračanice i on će u kućnoj izolaciji ostati još 14 dana radi sigurnosti, a nakon toga može da se vrati normalnim životnim navikama*". Negativan je i ponovljeni nalaz kod drugozaraženog iz Gračanice, potvrdio je za Radio Gračanicu epidemiolog Doma zdravlja Gračanica Muhidin Mujić. U Gračanici, dakle, više nema zaraženih, u izolaciji se nalazi 310 osoba, dok je do sada izolacija istekla za 1154 osobe.

17. 4. 2020.

Nema novozaraženih korona virusom u Gračanici.

Testirano je 66 osoba i svi su nalazi bili negativni. Prema izvještaju PS Gračanica od jučer je 7 novih osoba u kućnoj izolaciji, tako da ih trenutno ima ukupno 285. Vrijeme izolacije je isteklo za još 22 osobe, tako da je sada na evidenciji ukupno 1187 "oslobođenih". Kontrolna posjeta vršena je kod 25 osoba i svi su poštovali mjere izolacije. Inspektori su kontrolisali i 23 ugostiteljska objekta, ni kod jednog nije zabilježeno kršenje naloženih mjera. Sinoć su izdata i 3 prekršajna naloga za osobe koje nisu poštovala policijski sat, zabranu kretanja od 20.00 do 5.00 ujutro. U Tuzlanskom kantonu četvrti dan zaredom nije bilo pozitivnih na korona virus. Prema izvorima iz Federalnog štaba, na području Bosne i Hercegovine korona virusom do sada je zaraženo više od 1190 osoba, dok se više od 280 oporavilo (Radio Gračanica)

18. 4. 2020.

Smanjuje se broj Gračanlija u izolaciji, nema novozaraženih

Trenutno se u kućnoj izolaciji nalazi 211 osoba, dok je izolacija istekla za 1266 osoba. U Tuzlanskom kantonu je još uvijek 84 zaraženih, nema novih slučajeva zaraze. (Radio Gračanica)

20. 04. 2020.

Punih sedam dana nema novozaraženih u Tuzlanskom kantonu

Na redovnoj press konferenciji Kriznog štaba Ministarstva zdravstva saopšteno je da su u toku protekla 24 sata urađena 132 testiranja i da su svi bili negativni. U kućnoj izolaciji još uvijek je 807 osoba. Na području Tuzlanskog kantona do sada je ukupno testirano 2514 uzoraka. Do sada su u TK ukupno pozitivne 84 osobe, a aktivnih pozitivnih je 58. Broj otpuštenih iz bolnice je 20 osoba, a oporavljenih kod kuće 3. (Tuzlarije.net)

24. 4. 2020.

Konačno – ublažavanje mjera zabrane, ukinut policijski sat

Odlukom Federalnog štaba civilne ukinut je policijski sat, zabrana kretanja koja je bila na snazi od 21. marta. Restrikcije i dalje ostaju na snazi za osobe starije od 65 i mlađe od 18 godina. Naime, stariji od 65 godina pravo slobodnog kretanja imaju ponedjeljkom, srijedom i petkom od 9 do 13 sati, a mlađi od 18 godina utorkom, četvrtkom i subotom od 14 do 20 sati. Ukinute su mjere karantena, tako da će svi oni koji se trenutno nalaze u karanteni biti pušteni svojim kućama, gdje će im biti određeno da poštuju propise o kućnoj samoizolaciji. Također su ukinute određene zabrane koje se odnose na trgovine, markete i benzinske pumpe. Svi mogu da rade po svom ustaljenom radnom vremenu koje je bilo na snazi prije pandemije korona virusa. Potrebno je i dalje poštovati socijalnu distancu od najmanje 2 metra udaljenosti, a maska je i dalje obavezna oprema. Stavljene su van snage naredbe Kantonalnog štaba civilne zaštite kojima je ograničeno radno vrijeme prodavnicama prehrambene robe i benzinskim pumpama. Prodavnice, supermarketi i slični objekti mogu nastaviti raditi kako su i radile prije donošenja naredbi, a benzinske pumpe od 0-24

28. 04. 2020.**Nastavlja se povoljna epidemiološka situacija u Tuzlanskom kantonu.**

Raport iz Kantonalnog štaba: nema novih pozitivnih, nema oboljelih u bolnici, oporavilo se 80, još samo jedno aktivno pozitivno. Ukupno je do sada 3.948, od čega u protekla 24 sata 202 uzorka i svi su bili negativni. Otpuštenih iz bolnica do sada je 27, oporavljenih iz kućne izolacije 53. Do sada jedan premještaj radi liječenja u drugom kantonu i dva smrtna ishoda. U kućnoj izolaciji 696 lica.

29. 4. 2020.**Korona: stanje stabilno u Gračanici**

Trenutno se u izolaciji nalaze 153 osobe. Period izolacije je istekao za 1427 osoba, za 101 urađeni testovi su negativni. Prvi pozitivni pacijent iz Gračanice je nakon dodatnih 14 dana izolacije uradio test koji je ponovo bio negativan i pacijent se smatra izliječenim. Službenici Policijske stanice Gračanica su izvršili 22 kontrole lica koja se nalaze u kućnoj izolaciji. Svi su poštovali mjere prevencije u uslovima pandemije. Kontrolisano je i 19 ugostiteljskih objekata. Svi su se pridržavali mjera zabrane (Radio Gračanica)

30. 04. 2020.**Sedamnaest dana nema novih "pozitivnih" na korona virus u Tuzlanskom kantonu**

Nastavlja se povoljna epidemiološka situacija u Tuzlanskom kantonu. Nema novih zaraženih, nema oboljelih u bolnici. Ukupno je testirano 4.129 uzoraka, od čega u protekla 24 sata 181 uzorak i svi su bili negativni. Ukupno pozitivnih do sada je bilo 84, aktivno pozitivnih ostalo je jedno. Otpuštenih iz bolnica do sada je 27, oporavljenih iz kućne izolacije 53. Do sada je bio jedan premještaj radi liječenja u druge kantone i dva smrtna ishoda. Broj osoba koje imaju rješenje o kućnoj izolaciji je 770. Sa dolaskom naših državljana iz inostranstva, taj broj će se vjerovatno povećavati.

30. 4. 2020.**Federalni štab civilne zaštite: popuštanje nekih mjera, ali i zabrana okupljanja više od pet osoba 1., 2. i 3. maja, raspodjela 100 respiratora uvezenih iz Kine i druge opreme...**

Istom naredbom zabranio je kretanje od 22. 00 do 5.00 sati ujutro na području Federacije BiH, izuzev licima sa posebnim odobrenjima. Za 1. maj se naređuje zabrana okupljanja za više od pet osoba. Od 1. maja dozvoljen je rad trgovina na veliko i malo koje vrše promet svih vrsta proizvoda, uslužnih djelatnosti, malih obrta, što obuhvata frizerske i kozmetičke salone, odnosno sve male obrtnike koji potpadaju pod Zakon o obrtu i srodnim djelatnostima. Dopunio je i izmijenio i čitav niz drugih naredbi, koje će se primjenjivati do 15. 5. ove godine. Naredio je Federalnoj upravi civilne zaštite da izvrši raspodjelu testova na korona virus, zatim da stavi na raspolaganje zaštitna sredstva i opremu zdravstvenim i drugim ustanovama u F BiH, između ostalog i 100 respiratora kliničkim centrima i kantonima u Federaciji BiH po sljedećem rasporedu: po 10 Kliničkom centru Univerziteta u Sarajevu, Sveučilišnoj kliničkoj bolnici Mostar i Univerzitetskom kliničkom centru Tuzla, 12 Unsko-sanskom kantonu, 8 Hercegovačko-neretvanskom kantonu, 6 Tuzlanskom kantonu, po 5 Zeničko-dobojskom, Srednjobasanskom i Kantonu Sarajevo, po 3 Zapadnohercegovačkom i Kantonu 10, dva Posavskom i jedan respirator Bosansko-podrinjskom kantonu Gorazde. (tuzlarije.net-FTV)

30. 4. 2020.**Održana 12. sjednica Gradskog vijeća Gračanica: rebalansom Budžeta i drugim mjerama obezbijedit će se oko milion KM za pomoć privredi i građanima pogođenim pandemijom**

Sredstva se obezbjeđuju rebalansom (kroz preraspodjelu pojedinih stavki i kroz primjenu odluke o izmjeni propisa Grada Gra-

čanica, kojom se privredni subjekti (posebno mali biznisi) oslobađaju raznih komunalnih i drugih obaveza, kao što su komunalne takse, te zakupi i druge naknade iz nadležnosti Gradske uprave. Sredstva su namijenjena za ublažavanje posljedica korona virusa i male biznise. Predviđeni su i poticaji za proljetnu sjetvu, socijalna izdvajanja, zdravstvenu zaštitu i dr. Već u startu za radnike kod onih poslodavaca, kojima je po raznim naredbama bio zabranjen rad obezbijedena je po 1,5 minimalna plaća. Data je i saglasnost na odluku JP "Komus" o načinu obračuna usluga odvoza otpada privrednim subjektima na području grada Gračanica, čiji je rad obustavljen naredbama Federalnog štaba CZ. Neće im se obračunavati naknada za mjesec april, a u slučaju da se stanje nesreće produži, obračun će se vršiti mjesec dana nakon prestanka tih okolnosti.

5. 2020.

U Tuzlanskom kantonu je najstabilnija epidemiološka situacija u Bosni i Hercegovini.

Napori ljudi u Kriznom štabu, pripadnika MUP-a TK kao i građana koji se pridržavaju izdatih mjera, urodili su plodom. Od 13. aprila 2020. nema novih zaraženih korona virusom. Na današnji dan (6. maj 2020.) u Tuzlanskom kantonu broj ukupno testiranih uzoraka je 4.766, u protekla 24 sata testirano je 150 uzoraka i svi su bili negativni. Ukupno pozitivnih do sada je bilo 84, nema aktivno zaraženih osoba, bio je jedan premještaj u drugi kanton radi liječenja i dva smrtna slučaja. Broj osoba koje imaju rješenje o kućnoj izolaciji je 1.474. (Tuzlarije.ne)

7.5. 2020.

Vlada TK prihvatila Elaborat o društveno-ekonomskoj opravdanosti osnivanja JU Osnovna muzička škola Gračanica...

...i prosljedila ga Skupštini Tuzlanskog kantona na usvajanje. Riječ je o izdvajanju

odjeljenja paralelne osnovne muzičke škole iz sastava JU Osnovna škola "Hasan Kikić" Gračanica i osnivanju škole za muzički odgoj i obrazovanje kao posebne javne ustanove za što već odavno postoji inicijativa u Gračanici. U Elaboratu su predloženi podaci o ispunjenosti uslova za osnivanje škole u skladu sa Pedagoškim standardima i normativima, kao i drugi relevantni podaci koji se tiču osnivanja škole. (Izvor: tuzlarije.net)

10. 5. 2020.

Prijeko Brdo: nakon obnove džamije u mahali Rijeka, na redu je i stari oronuli mekteb u mahali Jahići...

Kako se sjeća mještalin tog sela Ibrahim Bešić (78 g, mekteb je star više od 100 godina, sagrađen je od drveta i tako očuvan do danas. Sve do 1957. godine, kada je izgrađena četverorazredna osnovna škola, u njemu se prije podne održavala nastava, a poslije podne vjerska pouka. "Vrijeme je učinilo svoje, pa se zgrada jedva drži da se ne sruši. To mi nećemo dozvoliti, jer stari mekteb je naša historija, u njemu smo se opismenjivali, odrastali. Naći ćemo donatora, pa mekteb vratiti u život. U njegovim odajama ima nešto sačuvanih starih predmeta, tu će i ostati", kaže Ibrahim Bešić. Mjesni imam Mustafa ef. Drndić već je razgovarao sa potencijalnim donatorima..." Inače, za temeljnu obnovu džamije u mahali Rijeka vrijedne džematlije tog sela prikupili su i uložili oko 100.000 KM (izvor: fotografija i tekst Gračanički.ba)

11.05.2020.

Nakon 29 dana, jedna osoba zaražena u Tuzlanskom kantonu

Kako je izjavila ministrica zdravstva TK Dajana Čolić, "radi se o uvezenom slučaju, osobi muškog spola koja je boravila van države, na području sjeverne Evrope. Po povratku u BiH, prije pet dana, izrečena mu je mjera kućne izolacije. Nakon nekog vremena dobio je temperaturu, pojavili su se simptomi, ra-

đeno je testiranje, koje je bilo pozitivno. “Ovo je situacija na koju smo upozoravali jer TK ne može vršiti kontrolu ko ulazi na područje našeg kantona. Nastavljamo sa radom kako smo i radili, i dalje testiramo i dalje tražimo. Za sada je jedna osoba, možemo reći da je u pitanju, klaster Gradačac. Posljednje dvije sedmice se vrši prošireno testiranje kasirki u marketima i tržišnim centrima, osoba koje rade u pogonima, a koje su u kontaktima sa osobama koje su u izolaciji. S obzirom da se najavljuje i otvaranje javnog prevoza i vrtića, i tu se vrši testiranje, u toku su ramazanski dani pa se testiraju zaposleni u pekarama, zdravstveni i medicinski radnici. Ovaj slučaj zaraženog nije iznenađenje, virus nije nestao, tako da je važno da se građani pridržavaju izrečenih mjera, posebno kada se najavljuju nova popuštanja.”

11. 5. 2020.

Raspisan javni poziv za dodjelu jednokratne pomoći Grada Gračanica privrednim društvima i samostalnim djelatnostima u cilju sanacije posljedica u privredi, uzrokovanih pandemijom

Poziv raspisuje Služba za poduzetništvo, lokalni razvoj i finansije, a odnosi si se na pravna i fizička lica s područja Grada, čija je djelatnost naredbama Federalnog štaba civilne zaštite i Kantonalnog štaba civilne zaštite TK zabranjena ili obustavljena. Na osnovu Pravilnika o kriterijima, načinu i postupku raspodjele tih sredstava iz Budžeta Grada Gračanica, pomoć mogu dobiti u visini jedne minimalne plaće u Federaciji BiH (406 KM) po svakom zaposlenom. Rok za podnošenje prijave je 25. 05. 2020. godine.

11. 5. 2020.

Konačno riješen pristup srednjovjekovnoj utvrdi Soko

Ovaj spomenik pod zaštitom države godinama je bio nepristupačan za posjetioce, zato što mu se nije moglo pristupiti ni sa koje

strane. Uzalud su bili pokušaji da se kupovinom jedne privatne parcele i kuće to pitanje kvalitetno riješi. Pitanje pristupa posebno je aktuelizirano nakon rekonstrukcije stare džamije, koja pripada širem kompleksu starog jezgra Sokola. Bez rješenja prilaza tvrđavi nije se moglo ništa poduzimati na njenoj zaštiti, proučavanju itd. Konačno, stvar u svoje ruke uzeli su mještani Sokola, svjesni da je oživljavanje tog spomenika, pored šireg značaja itekako i u njihovom interesu. Pronađen je alternativni prilaz, kroz teško pristupačan teren u dužini od nekih 150 metara, kojeg su vlastitim snagama ovih dana uredili kao solidan pristup vrhu gradine. Sve pohvale za ovaj “mali” veliki poduhvat treba uputiti Mjesnoj zajednici i njenom predsjedniku Mirzetu Topčagiću, te Islamskoj zajednici, koja je ustupila dio vakufske parcele za taj putić. Akciju je novčano pomogla i Gradska uprava Gračanica. Mještani Sokola uradili su što je bilo do njih. Sada je na potezu “struka” i neke više instance, od kojih se očekuje da pokrenu dugoročnu aktivnost na temeljnom uređenju ovog spomenika, koji bi trebalo da bude jedinstvena kulturno-historijska i turistička destinacija na području Grada Gračanica.

12. 5. 2020.

Mjere zabrane popuštauju za ugostitelje, javni prevoz i stomatologe

Iako pandemija još uvijek ima takozvani “pravolinijski tok” i još uvijek odnosi živote u BiH, Federalno ministarstvo popušta ranije donesene mjere zabrane. Svojim naredbama pod 12. 4. 2020. dozvoljava rad javnog linijskog i vanlinijskog prevoza putnika u cestovnom i željezničkom prevozu, zatim pružanje usluga ugostiteljskim objektima svih kategorija i hotelima na otvorenom prostoru (bašte i terase), te rad privatnih stomatoloških ordinacija i privatnih stomatoloških laboratorija – sve to, naravno uz poštivanje posebnih epidemioloških mjera.

12. 5. 2020.**Vlada Federacije suspendovala direktora Federalne uprave civilne zaštite Fahrudina Solaka**

Odluka je donesena nakon otkrivanja afere sa uvezenim respiratorima iz Kine koja u proteklih petnaestak dana potresa skoro čitavu državu. Njegove poslove preuzet će dosadašnji pomoćnik Mustafa Kadribegović. Solak će biti suspendovan dok se ne završi istraga koja se vodi zbog nabavke 100 respiratora iz Kine, od kojih je 80 već uvezeno putem firme "Srebrena malina", čiji je vlasnik Fikret Hodžić, a koja se bavi preradom i konzerviranjem voća i povrća. Riječ je o nizu nepravilnosti i milionskim zloupotrebama oko uvoza, što je već u rukama Tužilaštva i SIP-e. Za sporne respiratore uloženo je preko 10 miliona KM koje je osigurala Vlada FBiH. Nažalost, to nije jedini slučaj u kojem pojedinci i organizovane grupe koriste "hampu" oko pandemije za vlastiti šćar.

11. 5. 2020.**Dobra vijest iz MI "Kovan" Gračanica: krenuo izvoz dezinfekcionih tunela na zapadno tržište**

Kao što je nedavno najavio direktor ove kompanije Said Karalić prilikom doniranja dezinfekcionih tunela zdravstvenim ustanovama Gračanice i Doboj Istoka, iz njegovih proizvodnih pogona ispraćen je prvi šleper tih proizvoda za Mađarsku. U međuvremenu sve što je bilo vezano za certifikate tog proizvoda je riješeno. Ovi tuneli opremljeni su tako da, pored dezinfekcije, mjere i temperature svakome ko kroz njih prolazi, čime se obezbjeđuje sigurna i efikasna kontrola ulaza u objekte ispred kojih se instaliraju. Radi se o prvoj isporuci "Smak" kabina koje su namijenjene za evropsko tržište. Ugovor je definisan na 1000 komada godišnje, a ima nagovještaja, kako reče Karalić, da će se narudžbe u narednom periodu povećati. "Sretni smo što smo za vrlo kratko vrijeme vlastitim intelektualnim snagama i sredstvima razvili jedinstven

proizvod koji se po svojim karakteristikama razlikuje od sličnih na tržištu i što smo prva firma sa ovih prostora koja izvozi uređaje za borbu protiv virusa KOVD 19", izjavio je za medije Karalić. Ovaj primjer gračaničkog "Kovana" potvrđuje da i kriza može biti razvojnja šansa. (F. Kurtović)

12. 5. 2020.**Džamije otvaraju vrata za obavljanje svih namaza**

U skladu sa ranije donesenim propisima o postupanju u okolnostima pandemije, Reisu-l-ulema donio je odluku kojom se odobrava obavljanje noćnih namaza u svim džamijama (akšam, jacija, teravija i sabah namaz), počevši od 13. 5. 2020., pridržavajući se ranijih uputstava i smjernica državnih organa. Imami će podsjetiti džematlije na preporuku nošenja lične sedžade i tespiha, te o načinu izlaska iz džamije i poštovanja fizičke distance

13. 5. 2020.**Uz primjenu propisanih mjera, obdaništa mogu početi sa radom od 15. maja**

Kantonalni štab civilne zaštite Tuzla donio je Naredbu kojom se dozvoljava rad dječijih obdaništa (vrtića). Naredbom se zadužuje Zavod za javno zdravstvo TK da propiše proceduru rada dječijih obdaništa (Tuzlarije Net).

14. 5. 2020.**Asfaltiranje, asfaltiranje: pristupni putevi prema Sportskom centru Bazen i Gradskoj upravi**

Bez obzira na stanje pandemije, projekti za koje su bili potpisani ugovori se rade i završavaju po planu. Prethodnih dana završeno je asfaltiranje dijela prilaznog puta prema Sportskom centru "Bazen". Isto tako, završen je i projekat uređenja i asfaltiranja parkinga i priključnog puta na regionalnu cestu ispred Gradske uprave Gračanica. U okviru ovog

projekta rađena je rekonstrukcija i izgradnja oborinske kanalizacije, ugradnja tampona i asfaltiranje. Izvršena je zamjena dotrajalih i ugradnja novih ivičnjaka te izgradnja betonskih stopa za klupe u parku do parkinga. Takođe je izvršeno asfaltiranje malog parkinga iza zgrade kojim je praktično izvršena rekonstrukcija i sanacija kompletnog prostora koji će nakon radova na horizontalnoj signalizaciji dati jednu novu sliku izgleda prostora oko Gradske uprave i Srednjoškolskog centra. (Sl. portal Gradske uprave)

15. 5. 2020.

Ukinuto ograničeno kretanje starijim od 65 i mladim od 18 godina

Ovo ograničenje na teritoriji Federacije BiH bilo je na snazi od 4. aprila. Radilo se, da podsjetimo, o zabrani kretanja osobama mladim od 18 godina i starijim od 65 godina četiri dana sedmično, dok je tri dana sedmično kretanje bilo dozvoljeno: za djecu – utorkom, četvrtkom i subotom od 14 do 20 sati, a starijima od 65 godina – ponedjeljkom, srijedom i petkom od 9 do 13 sati. Prevoz mladih od 18 godina u vozilima s roditeljima i starijih od 65 bio je omogućen.

15. 5. 2020.

Ukinute mjere zabrane javnog linijskog i vanlinijskog prijevoza putnika u cestovnom i željezničkom prevozu na području Federacije BiH uz posebne epidemiološke mjere.

Kako su saopćili zvaničnici, u obavljanju javnog prevoza neophodno je primjenjivati mjere sprječavanja širenja COVID-19 kao i u svim drugim aktivnostima. Zavod za javno zdravstvo FBiH je izdao nekoliko preporuka kojih će se i putnici i uposlenici u saobraćaju do daljnjeg morati pridržavati.

18. 5. 2020.

I radno vrijeme Gradske uprave Gračanica – “po starom...”

Na osnovu novih Naredbi Federalnog štaba civilne zaštite i popuštanja mjera, Kolegij Gradonačelnika je odlučio da se od ponedjeljka (18. 05. 2020.) radno vrijeme Gradske uprave Gračanica vrati na staro stanje, odnosno trajat će od 7.30 do 16.00 sati, saopćeno je na službenom veb portalu Gradske uprave.

19. 5. 2020.

Crveni križ Grada Gračanice: akcije dobrovoljnog darivanja krvi i u vrijeme pandemije

Tokom trajanja pandemije ova organizacija je putem mreže svojih volontera kontinuirano pružala pomoć starim (preko 65 godine), iznemoglim i licima u stanju socijalne potrebe. Podijeljeno je preko 400 paketa hrane i higijenskih sredstava, pružena pomoć u hrani i higijenskim potrepštinama, nabavci lijekova i pomoć u kupovini hrane za stara i iznemogla lica u 230 slučajeva. Za svaku pohvalu su i dvije uspješno organizovane akcije dobrovoljnog darivanja krvi, u Bosanskom kulturnom centru, 30. 4. i u DOO “Fortuna” 19. 5. 2020. godine. Na akcije se odazvalo 43, a krv su darivala 34 dobrovoljna davaoca krvi.

19. 5. 2020.

Definitivna odluka: učenici se neće vraćati u školske klupe

Federalni krizni štab predložio je da školska godina bude završena putem interneta, što je potvrdila i resorna ministrica Fahreta Brašnjić. Kako je saopćeno, školska godina bit će završena 15. juna, kako je i bilo planirano, s tim što maturanti i prvačići nastavu završavaju nešto ranije. Ocjenjivanje učenika izvodi se putem online platforme. Prilikom zaključivanja ocjena nastavnici i profesori će u obzir uzimati zalaganje i aktivnost učenika u izvršavanju zadataka, te ocjenu koja je bila zaključena na polugodištu.

20. 5. 2020.**Normalizacija: sa radom počinju i restorani sa otvorenim terasama**

Nakon otvaranja frizeraja i kafića, dozvoljen je i rad restorana, uz izvjesna ograničenja. Dozvola se odnosi samo na objekte koji imaju vanjske terase dok zabrana još uvijek traje za one koji rade samo u zatvorenim prostorima. Inače, u posljednjih nekoliko dana ukinute su mjere zabrane za većinu ustanova i poslovnih objekata. Jedni od rijetkih koji se još uvijek nisu vratili u stanje prije korone su školarci, obrazovne ustanove, škole, fakulteti i tržni centri.

20. 5. 2020.**Održana 13. sjednica Gradskog vijeća: izvještaji o radu gradskih javnih ustanova i Općinskog suda u 2019.**

Na dnevnom redu su bili izvještaji: Obdaništa "Naša djeca", Centra za socijalni rad, Bosanskog kulturnog centra, Gradske apoteke, Veterinarske stanice i Doma zdravlja. Vijećnici su razmatrali i informaciju o higijensko-epidemiološkoj situaciji na području Gračanice. Donesena je i odluka o izmjeni propisa Grada Gračanica koja se odnosi na obezbjeđenje pomoći za ublažavanje posljedica korona virusa.

21. 5. 2020.**Poslovnim ljudima omogućen ulazak u BiH uz "pozitivno" pismo poslovnog partnera iz BiH i "negativan" test na korona virus, ne stariji od 48 sati**

To je odlučilo Vijeće ministara BiH, na prijedlog Ministarstva sigurnosti BiH. Kako je pojašnjeno, odlukom se omogućuje ulazak i boravak strancu koji u Bosnu i Hercegovinu ulaze zbog poslovnih obaveza, pod uslovom da posjeduju naznačenu dokumentaciju. Odluka je naišla na pozitivan odjek među domaćim privrednicima.

21. 5. 2020.**Ukida se samoizolacija od 14 dana građanima koji su ranije ušli u BiH**

Svi državljani Bosne i Hercegovine prilikom ulaska u domovinu na granici neće više dobiti rješenje o samoizolaciji. Odlukom Federalne uprave za inspeksijske poslove ukida se i samoizolacija za građane koji su ranije ušli u BiH. Da podsjetimo: federalni sanitarni inspektor je, do ukidanja ovih mjera, bio obavezan da svim licima koji ulaze u Bosnu i Hercegovinu izrekne rješenje o stavljanju pod zdravstveni nadzor i ograničavanje kretanja u trajanju od 14 dana.

22. 5. 2020.**Posljedice pandemije: nagli porast nezaposlenosti i u Gračanici**

Prema evidenciji Biroa za zapošljavanje za mjesec april broj nezaposlenih povećan je čak za 466 osoba u odnosu na prethodni mjesec. U martu je bilo 6819 nezaposlenih, a u aprilu ih je 7285. Od ukupnog broja nezaposlenih, više od polovine, 4653 su žene. Broj korisnika novčane naknade je 275 a broj korisnika zdravstvenog osiguranja je 4421 osoba. Posljedice pandemije po ekonomiju zemlje tek dolaze na "naplatu".

23. 5. 2020.**Pandemija jenjava: u BiH testirane 1.072 osobe, zaraženih 21**

Podaci su ohrabrujući: osam osoba zaraženo je koronavirusom u posljednja 24 sata u Federaciji BiH, a u Republici Srpskoj 13 osoba. U Kliničkom centru Univerziteta u Sarajevu u posljednja 24 sata testirano je 548 uzoraka na koronavirus. Na testiranju je potvrđeno devet pozitivnih, ali se u jednom slučaju radi o retestiranom uzorku pacijenta iz Bihaća. Osam je novih zaraženih koronavirusom, jedan je iz Trnova i sedam iz Tešnja – potvrđeno je iz KCUS-a. U Bosni i Hercegovini do sada je više od 2.370 zaraženih koronavirusom, od toga je 1.614 izliječenih. U trenutku smrti, 141 osoba bila je pozitivna na

Covid-19. U Institutu za javno zdravstvo Republike Srpske, Univerzitetskom kliničkom centru Republike Srpske i Bolnici "Sveti vračevi" u Bijeljini u posljednja 24 sata izvršeno je testiranje 524 laboratorijska uzorka, a novi koronavirus potvrđen je kod 13 osoba u Republici Srpskoj. Kako je saopštilo Ministarstvo zdravlja i socijalne zaštite RS, riječ je o osam žena i pet muškaraca. Tri žene su srednje životne dobi i pet žena je starije životne dobi. Pet muškaraca je srednje životne dobi. Prema mjestu prebivališta, po tri osobe su iz Prijedora i Banje Luke, po dvije osobe su iz Mrkonjić-Grada i Teslića i po jedna osoba je iz Dervente, Kozarske Dubice i Prnjavora. (Izvor: Slobodna Bosna)

25. 5. 2020.

Obilježen Dan odbrane Gračanice i Dan šehida.

Skromnije nego do sada, kako i priliči aktuelnoj epidemiološkoj situaciji, obilježavanje je započelo tradicionalnim prijemom zlatnih ljljiana kod Gradonačelnika. Nakon prijema i prigodnog programa u multimedijalnoj sali Gradske uprave, brojne delegacije položile su cvijeće i odale počast šehidima i poginulim borcima na Centralnom spomen-obilježju, odakle su se uputili ka šehidskom mezarju Šabuša, gdje su položili cvijeće i proučili Fatihu sa sve šehide. Gradonačelnik Nusret Helić je položio cvijeće i odao počast gračaničkoj mladosti na spomeniku "Mensur i Hava", a delegacija Gradske uprave i boračkih udruženja je položila cvijeće i na Zečevom gaju – mjestu stradanja i prvih žrtava u redovima branila Gračanice (Sl. veb. portal Gradske uprave).

27. 5. 2020.

Otvaraju se tržni centri, ugostiteljski objekti

Na današnjoj sjednici Federalni štab je dozvolio otvaranje tržnih centara i ugostiteljskih objekata u zatvorenim prostorima. Svi objekti moraju se pridržavati mjera koje je

propisao Federalni zavod za javno zdravstvo. Također, omogućen je rad bazenima, wellness i spa centrima, a od 30. maja dozvoljen je i nastavak Premijer lige.

27. 5. 2020.

Gradski štab civilne zaštite Gračanica: epidemiološka situacija na području grada zadovoljavajuća, nema pozitivnih na Covid-19

Odlučeno je i da se zatvore oba izolatorija u gradu koji su smješteni u dvorani Luke i prostoru Omladinskog centra ANEA. Preporuka je da građani i dalje obavezno nose zaštitne maske i da poštuju socijalnu distancu. Komandant štaba, gradonačelnik Nusret Helić je obećao da će se u najkraćem roku isplatiti novac onima koji su se prijavili na javni poziv za ublažavanje ekonomskih posljedica izazvanih korona virusom a kojima je zbog aktuelne situacije bio zabranjen rad. Zahtijeva se od građana poštivanje svih mjera zaštite u skladu sa važećim naredbama (nošenje maske, socijalna distanca, dezinfekcione mjere i sl.) u čemu aktivnu ulogu treba da ima i Radio Gračanica.

29. 5. 2020.

Jedna osoba iz klastera u Tešnju nastanjena je u Gračanici

Prema informacijama nadležnih epidemioloških službi, u Tešnju su zaražene 63 osobe. Novi klaster je firma "Koža-komerc", a svih 80 uposlenika te kompanije je od 23. maja u samoizolaciji. Jedna osoba iz klastera u Tešnju nastanjena je u Gračanici. (Izvor: Radio Gračanica)

29.05.2020.

Nema novih zaraženih u Tuzlanskom kantonu

Kako je službeno saopšteno, u protekla 24 sata u Tuzlanskom kantonu testirana su 132 uzoraka i svi su bili negativni. Ukupno pozitivnih na području TK od početka testiranja (27.mart) bilo je 98, dok je trenutno aktivno

pozitivnih na korona virus 13 lica, od kojih 7 pripada klasteru Živinice, 1 Gračanici i 5 klasteru koji se veže za let iz Saudijske Arabije. Svih 13 aktivno zaraženih se liječi kod svojih kuća. Broj osoba koje imaju rješenje o kućnoj izolaciji je 31, do sada je urađeno 8.756 testiranja. Do sada su bila tri smrtna slučaja. (tuzlarije.net)

29. 5. 2020.

Gračanička kompanija "Adam Co": vrijedni poslovi u Italiji

Gračanička kompanija "Adam Co", specijalizirana za proizvodnju željeznih konstrukcija, potpisala je ugovor s italijanskom kompanijom "Fincaniteri" o izradi "pijole", metalnih dijelova za kruzere, vrijedan oko 2,5, miliona dolara. Ugovor će realizovati u brodogradilište koje se nalazi u italijanskom gradu Monfalconeu. Tamo je već otišlo 35 CNC operatera, zavarivača, bravara i montera, a uskoro kreće i druga grupa od 22 radnika, izjavio je za "Dnevni avaz" vlasnik kompanije "Adam Co" Adis Kovačević. (Izvor: Dnevni avaz)

30. 5. 2020.

Svih pet Gračanlija testiranih na koronavirus su negativni.

Riječ je o osobama koje su bile u najbližem kontaktu sa zaraženim muškarcem koji je zaposlen u Tešnju. To je službeno saopšteno iz Doma zdravlja Gračanica (Radio Gračanica)

31. 05. 2020.

Proglašen prestanak stanja nesreće, uzrokovane koronavirusom u FBiH

Prema odluci Vlade Federacije BiH, sa 31. 5. prestaje stanje nesreće uzrokovane pojavom koronavirusa (COVID-19) na području Federacije BiH, koje je Vlada proglasila 16. 3. 2020. godine. Federalni štab civilne zaštite i Krizni štab Federalnog ministarstva zdravstva zaduženi su da i dalje prate i procjenjuju stanje epidemiološke situacije na području Federacije i na toj osnovi utvrđuju mjere i aktivnosti na sprečavanju širenja koronavirusa.

Federalna uprava civilne zaštite zadužena je i da, u slučaju potrebe, stavi na raspolaganje snage i sredstva iz sastava odgovarajućih federalnih specijaliziranih jedinica civilne zaštite i službi zaštite i spašavanja Federacije BiH. Vlada je zadužila rukovodioce organa uprave i upravnih organizacija Federacije BiH i kantona, odnosno rukovodioce općinskih/gradskih službi za upravu da, u okviru svoje redovne djelatnosti, obavljaju i dodatne poslove koji se odnose na otklanjanje posljedica nastalih djelovanjem nesreće. (tuzlarije.net)

1.6. 2020.

Bosna i Hercegovina otvara granice prema susjedima

To je odluka Vijeća ministara Bosne i Hercegovine koja se odnosi na Hrvatsku, Srbiju i Crnu Goru, odnosno za sve njihove građane, kojima se od 1. juna omogućava nesmetan ulazak u Bosnu i Hercegovinu, bez ograničenja. U ovaj set mjera koje olakšavaju protok ljudi, roba, i kapitala uključena je i odluka da se za saobraćaj otvore međunarodni granični prijelazi na aerodromima u Bosni i Hercegovini, uz pridržavanje svih ograničenja koja su definirana u skladu s aktuelnom epidemiološkom situacijom. Dakle, od 1. juna, također, otvaraju se i aerodromi u našoj zemlji. Prvi let sa tuzlanskog aerodroma zakazan je za 1. juni u 6:35 sati a riječ je o letu Tuzla – Dortmund. (RTV Slon)

1. 6. 2020.

Dozvoljeno okupljanje do 100 ljudi u zatvorenom prostoru, nije obavezno nošenje maski na otvorenom

Prema odluci Kriznog štaba federalnog Ministarstva zdravstva, ovo pravilo vrijedi ako je moguće držati razmak od dva metra, dok je nošenje zaštitnih maski u zatvorenom javnom prostoru i dalje obavezno. Dozvoljeno je i javno okupljanje ljudi na određenom prostoru, ali pod uslovima da u zatvorenom prostoru ne može biti više od stotinu, a na

otvorenom više od 300 ljudi. Sva okupljanja unutar navedenih ograničenja moraju se odvijati u prostoru koji omogućava obaveznu fizičku distancu od najmanje dva metra između osoba, osim članova istog domaćinstva. Građanima se, osim držanja fizičke distance, preporučuje češće pranje ruku, dezinfekcija površina i predmeta i druge mjere higijene. (tuzlarije.net)

2. 6. 2020.

Skromnije nego do sada obilježen Dan Grada Gračanica, 2. juni

Po uobičajenom protokolu položeno je cvijeće na gradska spomen obilježja, a potom u velikoj sali Bosanskog kulturnog centra održana svečana sjednica Gradskog vijeća. Zbog epidemiološke situacije, nisu prisu-

stvovali predstavnici zbratimljenih gradova Pljevlja i Flori Lezobre. Na sjednici su se kratko obratili Gradonačelnik Nusret Hećić i predsjedavajući Gradskog vijeća Nihad Krajnović, a potom prikazan dokumentarni film o najvažnijim uspjesima i dostignućima na području Grada "Od juna 1919. do juna 2020" autora Fahrudina Kurtovića. Umjesto tradicionalnih godišnjih priznanja Grada, na simboličan način dodijeljeno je priznanje svim građanima Grada Gračanica za disciplinovanost ponašanje i iskazanu odgovornost, kako je rečeno "u vrijeme trajanja vanrednog stanja i doprinosa u suzbijanju širenja koronavirusa na našem području." Dodijeljene su i nagrade za pobjednike na foto konkursu "Stazama mog zavičaja".



N. G. G. G. - 1850 - 12
Monks and Peasants